



BOPHELO JWA GA PAULO

VERNA SAVAGE

BOPHELO JWA GA PAULO

VERNA SAVAGE

LENANEO LA DITENG

TSHEDIMOSE TSO KAKARE TSO LE DIKAELO

THUTO	TSEBE
1. Botsalo jwa ga Paulo	7
2. Paulo mo Damaseko	9
3. Paulo o simolola tirelo ya gagwe	12
4. Paulo o boela gae	16
5. Paulo o simolola letsholo la bobedi	20
6. Paulo mo Athene le mo Korinthe	23
7. Letsholo la boraro	26
8. Paulo mo Jerusalema	30
9. Paulo fa pele ga Feseto	33
10. Paulo mo Roma	37
11. Paulo mo kgolegelong	40
12. Malatsi a bofelo a ga Paulo	43

Copyright, 2007
International Publications Services
All Rights Reserved
IPSIMB.com - bw-lop-bot-tsw

TSHEDIMOSETSO KAKARETSO LE DIKAEOLO

Dithuto tsa BIBLE WAY di rulaganyeleditswe ba ba iseng ba katiwe mo dithuto tsa Beibele. Fela di tlhagisiwa ka tsela e e leng gore le ba ba kileng ba ithuta Beibele dingwaga ba ka thusega ka dithuto tsena.

Maikaelelo ka dithuto tsena ke go tlhagisa leano la Modimo la pholoso. Go katisa mo kitsong ya Beibele, le go kgothatsa Bakresete go gola. Mongwe le mongwe o amogelwa go ka tsaya thuto ena.

Beibele o tshwanetse go e dirisa fa o ithuta dithuto tsena. O tshwanetse go buisa ka kelotlhoko ditemana tse di tlhagang mo thutong e o e ithutang. Fa go na le mafoko a o sa a tlhaloganyeng mo Beibeleng gongwe mo thutong, batla tlhaloso ya one mo dikishinaring e e siameng.

Go fetola aterese. Fa ele gore aterese ya ggo ya poso e fetogile, itsise motsamaisi wa Bible Way.

Nomore e e tlhomameng ya moithuti. Morutwa mongwe le mongwe yo o ikwadisang mo sekolong sa poso sa Bible Way o neiwa nomore. Nomore ena e bothokwa thata go nne dikwalo di beiwa ka nomore ya gago. Fa o kwalla Motsamaisi wa Bible Way o tshwanetse go naya Leina la gago le Nomore ya morutwa le Aterese.

*ENA KE NOMORE YA
MORUTWA
(E DIRISE KA GALE*

ELA TLHOKO!


Go ka amogetse setifikarata sa BOPHELO JWA GA PAULO ditlhatlhobo tsa gago di tshwanetse go bo di tladitswe mme di rometswe go rona.

MATSENO

Mo bukeng ena re tlaa ithuta ka ga Paulo. Re tlaa ithuta gore o tsholetswe kae, o ne a phela jang, le mafelo a a ne a rera go one. Go go thusa go ka bona mafelo a a umakiwang mo bukeng ena mo Beibeleng, ditsebe tse tharo tse die latelang ke mmapa wa mo o Paulo a tsamaileng teng. Dirisa dimmapa tsena fa o ntse o ithuta.

Bophelo jwa ga Paulo bo kwadilwe mo kgolaganong e ntsha mo bukeng ya Ditiro. O tshwanetse go buisa buka yotlhe ya Ditiro fa o ithuta buka ena.

Go ithuta bophelo jwa ga Paulo go botlhokwa go rona gonne re ka bo dirisa gonne motsamaisi wa diphuthago tsa rona le wa bophelo jwa rona.



LEETO LA BOEFANGEDI LA BOBEDI LA GA PAULO

THUTO 1

BOTSALO JWA GA PAULO

GO BUISA MO DIKWALONG: Ditiro 21:39; 22:3, 27-28

TEMANA YAGO O E ITSE KA TLHOGO: “*Gopola Mmopi wa gago o sa le moša*” – Moreri 12:1

Mo thutong ena re simolola thuto ya rona ka ga bophelo jwa Paulo. Ka Sehebere leina la gagwe e ne ele Saulo mme ka Segiriki e ne ele Paulo. O ne a bidiwa Saulo go fitlha a ba a sokologa. Paulo e ne ele Mojuta mme ebile o ne a ipela go nna ena. Paulo e ne ele wa lotso lwa ga Benjamine. Gape Paulo e ne ele moagi wa Roma.

KA BOTSALO KE WA TARESO

Paulo o tshotswe gaufi le nako ya go tsholwa ga Kresete. O tshole-tswa mo Tareso, motse o o ne o itsege thata ka nako eo. Tareso e ne ele bokgakala jwa kwatara ya maele go tswa kwa lewatlang la Meduterranean; ka jalo e ne felo ga bothokwa ga kgwebo gape e ne ele motse wa go ithuta. Barutwa go tswa dikolong tse di itsegeng thata tsa teng ba ne ba ya mafelong otlhe a a farologanyeng a puso ya Roma. Mo motseng o na go ne go le batho ba bothabatsatsi, le ba merafe e mengwe.

Mo motseng ona Paulo o ne a ithuta gore baditshaba ba phela jang. Ke kamoo erileng fa go fitlhile nako a kgona go ba tlisetse Efangele ya ga Kresete sentle thata.

GO RUTWA GA GAGWE

Ka go ya ka moetlo wa Bajuta mosimane mongwe le mongwe o ne a neiwa thuto e e siameng thata. Ka gone Paulo e ne ele morwa wa Mojuta yo o ineetseng, o ne a amogela Katiso e e siameng mo lapeng la ga gabo. O amogetse thuto ya tshimologo. Mme erile a le dingwaga di le 13 go ya go 15 ke fa a romelwa kwa Jerusalem go tswetsa thuto ya gagwe. Mo sekolong sa barabi (sekolo sa go katisa ba borapedi jwa Bajuta.

Paulo o ne a na le sebaka sa go ithuta mo go Gamaliele yo mongwe wa baruti ba bagolo ba nako eo. Gongwe Paulo e ne ele morutwa yo o kgonang, o kare Gamaliele o ne a mo tlotla.

GO BOELWA KWA TARESO

Erile fa Paulo a sena go fetsa dithuto tsa gagwe mo Jerusalema, a boela motseng wa ga gabo wa go tsalwa wa Tareso. Jaanong o ne a siametse tiro ya gagwe. Batsadi ba gagwe le barutabana ba ba mo rutileng ba ne ba ipela ka ena. Go bonala gore o ntse dingwaga di se kae mo Tareso e le rabi (moruti wa borapedi jwa Bajuta). Mo dingwageng tsena ga re utlwe sepe ke ga gagwe se se kwadilweng go fitlha a ba a boela kwa Jerusalema pele ga loso lwa ga Setefane. Paulo o tshwanetse go ba a utlwile ka ga mokgatlho wa Bakresete o o neng o gwetlha tumelo ya Bajuta. O ne a rata go ya go ba thusa go femela tumelo ya bo rraabo. O ne a na le Bajuta ba ga gabo fa go ne go sekisiwa Setefane. Le fa a sa konopa matlapa go bolaya Setefane fela o ne a dumelana le gore a bolaiwe. O ne a le maikutlwo a le mangwe le batho ba ga gabo. O ne a bona Setefane fa a swa. Le fa e ne a ne a sa itse ka nako eo, fela tiragalo ena e na le kabelo e e bothokwa mo kgethong ya gagwe ya go latela Kresete.

GO BOGISA BAKRESETE

Pualo e ne ele moeteledipele mo Bajuteng. Baeteledipele ba bagolo ba ne ba emela fa thoko mme ba letlella Paulo go laola setlhopha sa go nyeletsa Bokresete. Paulo ka boena o tlhalosa tse a di dirileng kgatlhanong le Bokresete. "Ke ne ke bogisa (Bakresete) go fitlha baa swa, ke ba golega ke ba neela mo kgolegong. Ke neilwe nonofo ke baperisiti ba bagolo, mme e ne ere fa ba bolaiwa ke ne ke dumellana le ba ba dirang jalo. Ke gantsi ke ba sekisa le go ba otlhaya ke pateletsa go latola tumelo ya bone mo Moreneng. Ke ne ke tuka bogale kgatlhanong le bone, ke ba kobela mo metseng e e kgakala."

Paulo e ne ele Mojuta yo o ineetseng, yo o ne a akanya gore o dira sentle fa a nyeletsa Bakresete. E ne ele pele ga gore a itemogele lorato le bophelo jwa Morena le Mopholosi Jesu Kresete.

THUTO 2

PAULO MO DAMASEKO

GO BUISA MO DIKWALONG: Ditiro 9:3-25

TEMANA YAGO O E ITSE KA TLHOGO: *“O ne a rera Jesu, gore ke ene Morwa Modimo”* – Ditiro 9:20.

Go tlabologa ga Paulo ke nngwe ya ditiragalo tse kgolo mo ditiragalong tsa lefatshe. Paulo o ne a setse a kile a nna le kabelo mo go bolayang le go tsenya mo kgolegong dikete tsa Bakresete. Jaanong o mo tseleng ya go ya kwa Damaseko, motse o o tswelletseng pele wa kwa Siriya, go ya go tlasela Bakresete kwa teng.

PAULO O SIMOLOLA A LEBILE KWA DAMASEKO

Go kwadilwe ka makgetlo a mararo ka ga maitemogelo a ga Paulo a tlabologo mo kgolaganong e ntsha. Luka o re nea one mo dinneteng tsa ditiragalo tsa lefatshe. Paulo o re bolella ka ga one ka mafoko a gagwe. Tshotlhe di fitlhelwa mo bukeng ya Ditiro).

Paulo o ne a dira gore Bakresete botlhe ba ba mo Jerusalema ba boife leina la gagwe. O ne a atlega mo go phatlalatseng le mo go didimatseng Bakresete ba bantsi mo motseng o o boitshepo. O ne a utlwile ka ga setlhophha se segolo sa Bakresete se se leng mo Damaseko.

Damaseko e ne ele bokgala jwa dimmaele di ka nna 150 go tswa mo Jerusalema. O ne a ikaella go ya teng le go ya tswella pele ka go bogisa badumedi ba na. O ne a amogela nonofo le dikwalo go ya mo motseng o na le go tshwara Bakresete botlhe ba teng go bua le bone ba golegilwe mo Jerusalema. E ne le ba ba neng ba na nae ba ne ba simolola leeto le le leele la go ya kwa Damaseko. E ne ele leeto la matsatsi a marataro gongwe a supa mme mo leetong le na le le telle lekau lena le le botlhale le mafolofolo le ne le tlaa nna le nako ya go akanya. Gongwe o ne a setse a simolola go belaela ka ga se a se dirang. Mo tlhaloganyong ya gagwe o ne a sa lebale Setefane yo o suleng ka tidimalo. O ne a sa lebale thapelo ya ga Setefane fa a ne a “robala” ka kagiso. Paulo o ne a ikutlwela gore o tshwanetse go dira se se siameng, fela o ne a tshwengwa ke potso e a ne a pallwa ke go e araba. Ke fa a ya kwa Damaseko.

TLHABOLOGO YA GA PAULO

Dikgang tsa gore Paulo o tla Damaseko di fithile teng pele ga gore Paulo a goroge teng. Paulo o tlhabologile a le gaufi le motse ona. Erile ele motshegare tadi e amusa, lesedi le le fougatsang, la phatsimela Paulo le ba ba neng ba na nae. O ne a wela fa fatshe a fougatse. Ke fa a utlwa lentswe le mo raya le re,

“Saule, Saule, o mpogisetsang?” Ene Are: “O mang Morena?”

Jesu o ne a mo araba are: “Ke nna Jesu yo o mmogisang, nanoga o tsene mo motseng, O tlaa bolellwa se o tshwanetseng go se dira.”

Ke fa Paulo a tsoga fo fatshe, mme a lemoga gore o fougatse. Batho ba bangwe ba ba ne ba na nae ba ne ba mo tshwara ka letsogo ba mo isa mo Damaseko. A tlhola malatsi a le mararo a sa bone, a sa je, a sa nwe. Maitemogelo ana a ne a mo fetola ka botlalo. Jaanong Mofarasai yo o ikgodisang ke motho yo o iteilweng, yo roromang, yo o phopholetsang, yo o ngaparetseng letsogo le le mo tsamaisang fa a goroga. O ne a ya kwa ntlung ya ga Jutase mme a tlhamallela kwa phaposeng ya gagwe. Ke moo a ntseng teng malatsi a mararo a sa je a sa nwe. Mo malatsing ana Paulo o ne a rapela le go itima dijo. Bophelo jwa gagwe jotlhe bo ne ba fetoga mo kopanong e na ya gagwe le Kresete. Jaanong o tshwanetse go aga gape bophelo jwa gagwe mo go Kresete.

ANANIA

Anania e ne ele morutwa mo Bakreseteng ba Damaseko. O ne a ratiwa le go tlotliwa ke botlhe ba ba ne ba moitse.

Anania o ne a bona pono mme a laelwa gore a ye kwa tlung ya ga Jutase a batle Saule wa kwa Tareso. Anania o ne a utlwile tsotlhe tse setlhogo tse Paulo a di dirileng kगतलhanong le Bakresete. Gongwe o ne a itse gore Paulo o tlile Damaseko ka lone lebaka lena. Fela Morena o ne a mo tlhomamisetsa gore a se ka a boifa sepe ke fa Anania a tloga a ya go bona Paulo. A baya lekau la mofarasai diatla mo tlhogong mme a mmita are: Saulo mokaulengwe, Mme a mmolella gore Jesu ke Ene yo o Paulo a mmonyeng mo ponong ya gagwe. Ke fa matlho a ga Paulo a buduloga mme a amogela neo ya Moya o o Boitshepo. Erile morago ga moo a kolobediwa, gongwe a kolobeditswe ke Anania.

PAULO O SIMOLOLA GO RERA

Ga go re gagamatse fa moapostoli o na yo moshwa a simolola ka bonako jaana ka tiro ya gagwe e ntšha. O simolotse ka go rera Kresete le go bolela gore Kresete ke Morwa wa Modimo. Barutwa ba ne ba gaggamadiwa ke phetogo ena e e gaggamatsa mo go Paulo. Bajuta ba ba mo utlwileng ba ne ba sa dumele gore ke na motho yo ba neng ba

mo itse. Fela Paulo o ne a gola mo thateng mme a nonofa fa a ntse a rera.

Paulo o ne a ya kwa Arabiya mme a nna teng dingwaga tse tharo. Nako ena nako ya go ithuta le go akanya ka ga go ipakanyetsa tirelo ena ya botlhokwa e e ne ele fa pele go gagwe.

Erile a sena go nna mo Arabiya, a boela kwa Damaseko, moo batho ba ne ba reetsa thero ya gagwe ka mafolofolo. Fela erile go ise go fete nako e telle ke fa Bajuta ba batla go mmolaya. Barutwa ba ne ba loga leano la gore a falole, ba mo tsaya bosigo ba mo folosa ka fa loboteng, ba mo lepeletsa ka seroto.

Jaanong Paulo o ne a tlhaloganya ka moo a neng a dira go Bakresete. Go tloga ka nako eo Bajuta ba ne ba batla go mo nyeletsa. Paulo e ne ele motho yo o kgonang go rerela Bajuta le Baditshaba Efangele. O godile le Baditshaba mo motseng wa Tareso mme a phela le Bajuta le go ithuta le bone.

THUTO 3

PAULO O SIMOLOLA TIRELO YA GAGWE

GO BUISA MO DIKWALONG: Ditiro 9:19-22; Ditiro 11:25-26; 13:1-52; 14:1-7

TEMANA YAGO O E ITSE KA TLHOGO: *“Teng kwa Antiogia barutwa ba simolola go bidiwa Bakriste”* – Ditiro 11:26.

Mo thutong ena re simolola go ithuta ka ga matsapa a ntlha a borongwa a Phuthego ya Bakresete go baditshaba. Sena ene e se morero wa motho, fela e ne ele morero wa Modimo wa go phatlalatsa Efangele mo lefatsheng lotlhe la merafe yotlhe le batho botlhe. Jesu o rile,

“Mme nna, fa ke tsholediwa mo lefatsheng, ke tlaa gogela batho botlhe kwa go nna.”

O rutila barutwa ba gagwe ka ga thomo ya go ya mo lefatsheng lotlhe. “Thomo ya gagwe e kgolo” ere e yang go merafe yotlhe.” Go ne go le thata go balatedi ba gagwe ke raya le morago ga tsogo ya ya gagwe le morago ga tlhatlogo, go ka simolola tiro ena. Gongwe barutwa ba na ba ntlha ba ne ba tlaa nna mo Jerusalema, fela dipogiso di ne tsa thatafala moo ba neng ba phatlalala kwa mafatsheng a mangwe. Mme ka go dira jalo ba nna barongwa ba tumelo ya bone kwantle ga go rulaganya go ka dira jalo. Fela Bakresete ba na ba ne ba tlhoka moetapele wa go ba rulaganya go rulaganya mananeo a bona, le go ba etellapele mo thomong ya bone go batho ba Ditshaba. Moetapele yo o e ne ele Paulo. Erile morago ga dingwaga tse di lesome a sena go tlabologa ke fa a ipakanyetsa thomo ena ya phuthego mme a ikaelela go nna moetapele.

PHUTHEGO KWA ANTIOGIA

Antiogia, mo go ne go nna batho ba ba ka nnang bontlhangwe jwa miliyone, ka nako eo e ne ele mongwe wa metse e megolo ya puso ya Roma.

Moreri wantlha wa go goroga mo Antiogia a tswa kwa Jerusalema o ne a ikaetse go direla Bajuta ba motse o o. Fela ba bangwe ba ba ne ba tswa kwa Kiperu le kirene ba ne ba simolola go dira mo

Bagerikeng. E ne ele lekgetlo la ntlha gore go tseiwe matsapa a go dira mo go Baditshaba. Go tloga mo tshimologong phuthego e ne e nonofile thata.

“Mme letsogo la Morena le ne le na le bone;
Mme palo e kgolo ya dumela le go tlabologela go Morena.”

Phuthego e na e ntšhwa mo go ne go obamela batho ba merafe yotlhe e ne ya nna nngwe ya diphuthego tse di nonofileng tsa nako eo. Sena ke thuto e kgolo go rona gompieno. Fa re ka lebala dikgopi tsa rona le megopolo ya rona e e maswe go batho ba merafe e mengwe le ditshaba tse dingwe mme ra obamela Morena ka boamaruri le ka moya wa boamaruri le diphuthego tsa rona di ka nna le nonofo ena eo phuthego e na e ntšhwa e ne ena nayo.

Fa tlase ga boeteledipele ba ga Barnaba phuthego e ne ya gola thata moo a neng a tlhoka thuso. Erile fa Paulo a tla a tswa Tareso go tla go thusa mo tirong ya phuthego, phuthego e ne ya nonofa thata. Ke fa phuthego e tlhoafalela go gasa lefoko go batho ba bangwe ba ditshaba di sele le phuthego ena e e nonofileng e ne ya nna le tlotlo ya go nna bonno jwa go rerela Baditshaba Efangele. E ne ele mono mo Antiochia moo barutwa ba ne ba bidiwa Bakresete lantlha.

TIRO YA MOYA O O BOITSHEPO

Buisa mo go Ditiro 13:1-2. Re bolellwa gore erile fa baetapele ba na ba ntse ba rapela le go itima dijo ke fa Moya o o Boitshepo o bua le bone o ba raya ore, Nntshetsang Barnaba le Saulo, gore ba ye tirong e ke ba e bileditseng. Dikwalo di tswellapele go re bolella gore ba ne ba ba baya diatla mme ba ba naya tsela go ya go dira tiro ena. Phuthego ya Antiochia e ne ya ikutlwela fa e latlhegetswe thata ka go tloga ga baetapele ba na ba ba nonofileng, fela e ne e tshwanetse go ka bo e ne ya ikutlwela gore sena ke sebaka sa go ka nna le kabelo mo tirong ena e kgolo ya go abelana le batho ba lefatshe le lengwe Efangele.

BA SIMOLOTSE LETSHOLO LA BONE LANTLHA

Baranaba, Paulo le Johane yo o bidiwang Mareko lekau le le tswang kwa Jerusalema ba ne ba simolola leeto lwa bone. Baranabo, ke e ne yo mogolo mo go bone, o ne a tseiwa jaaka moeteledipele. Paulo le Baranaba e ne ele ditsala tse di kgolo thata, ba ne ba itumellanang thata. Johane yo o bidiwang Mareka o ne a tsamaya le bone go ba thusa. E ne ele Morwa wa ga Maria, mokresete yo o ineetse, yo o mafolofolo mo Jerusalema. E ne ele ntsalago Baranaba.

Ba tlogile ka mokoro go ya kwa Seloikia mme ba tsamaya sebaka se senyenyane sa go ka nna dimaele di le masome a a supang go ya kwa Salamia, mo lobopong lwa bophirima lwa Kiperu. Kiperu e ne ele legae la bogologolo lwa ga Baranaba.

Barongwa ba Efangele ba ne ba etela mafelo otlhe a magolo a setlhakatlhake sa Kipero go fitlha mo Phafo. Mo Pharo ba ne ba kopana le batho ba babedi ba bagolo. Monna wa moitseanape yo o bidiwang Elemase BareJesu le Seregio Paulo monna wa molaodi, monna wa tlhaloganyo wa setlhakatlhake seo. Seregio Paulo o ne a bitsa Baranaba le Saulo, a eletsa go utlwa lefoko la Modimo. Erile fa barongwa ba Efangele ba leka go gapela Paulo kwa go Kresete. Elemase o ne a leka go ba thibela. Mo bokhutlong Paulo a mo kgala ka go bua mafoko ana “Wena wa ga Diabolo” mme a iteiwa ka bofoku sebakanyana. Paulo o ne a amega thata mme a dumela thuto ya Morena.

Go tloga ka nako e na ga Luka a bua ka ga barongwa ba na ba Efangele are Paulo le ba a nang nabo gongwe are “Paulo le Baranaba.”


GO MAFATSHE A MAGOLO

Jaanong ba ne ba tloga mo Phafo mme ka mokoro, ba fitlha kwa Perege wa Pamefilia. Teng foo Johane a ba tlogela a boela kwa Jeru-salema.

Paulo le Baranaba ba tloga ba fitlha kwa Antiogia wa (Pisidia). Paulo o ne a ya kwa Senagogeng mme teng a rera molaetsa wa ga Kresete. Batho ba ne ba amiwa ke thero ya gagwe mme ba mo kopa gore a rere gape. Erile ka sabata yo o latelang Paulo a rera gape mme ga batla go phuthega motse otlhe, go utlwa lefoko la Modimo. Sena se ne sa tena Bajuta. Ba ne ba tlala lefufa, mme ba ganetsa tse di builweng ke Paulo. Paulo a ba bolella gore Bajuta ba neilwe sebaka sa ntlha sa go amogela lefoko. Mme jaanong ere ka ba lo ganne, e na le Baranaba ba tlaa ya go Baheitane. “Yare Baheitane ba utlwa, ba itumela, ba galaletsa lefoko la Morena. Botlhe ba ba tlhaoletsweng botshelo jo bo sa khutleng ba dumela. Lefoko la Modimo la ba la anamisiwa mo lefatsheng leo lotlhe.” Efangele e ne ya simolola go tsena mo teng ga motse o mogolo wa Baheitane.

Bajuta ba ne ba tsoetsa Paulo le Baranaba pogiso, ba ba leleka mo motseng wa bone.

Dimaele tse di batlileng go ka nna masome a a ferang bobedi borwabophira ba Antiogia go ne go le motse wa Ikonio. Paulo le Baranaba ba ne ba tlhamallela kwa sinagogeng moo Paulo a ne a rera teng. Bontsi jo bogolo bo neng jwa dumela mme jwa amogela Kresete. Fela le teng go ne go na le dira. Baapostola ba ne ba dira ditshupo tse di ntsi le digakgamatso mme ba nna teng nako e telle ba rera lefoko la Modimo. Mo bo khutlong dira di ne tsa bopa setlhopa mme ba tshose-tsa go bolaya barongwa ba ba Efangele. Mme Paulo le Baranaba ba tshwanela go tsamaya.



LEETO LA BOEFANGEDI LA BORARO LA GA PAULO

THUTO 4

PAULO O BOELA GAE

GO BUISA MO DIKWALONG: Tirito 15:1-35

TEMANA YA GO E ITSE KA TLHOGO: *“Mme re dumela gore re pholosiwa ka bopelotlhomogi jwa Morena Jesu fela jaaka bone”*
– Ditiro 15:11.

Paulo le Baranaba ba ne ba kobiwa mo motseng wa Ikonio. Erile go tloga foo ke fa Paulo a ya kwa Lesitara. Mo motseng ona go ne go tshwanetse ga bo go ne go na le malapa mangwe a Bajuta. Go ne go na le ba lolapa le lengwe la Bajuta. Mme wa lapa leo e e ne ele mosadi wa moswagadi leina la gagwe e ne ele Onika. One a na le morwa yo o bidiwang, Timotheo. Monna wa gagwe e ne ele moheitane mme ka moo Timotheo ga aka a rupisiwa. (Go ne go batlega gore motho a rupisiwe gore a tsene mo borapedi ba Bajuta). Loise mmaago Onika, ba ne ba nna mmogo. Paulo le Baranaba ba ne ba gapela ba lelapa lena go Kresete.

PAULO MO LESITARA

Erile fa Paulo a goroga mo Lesitara, mongwe wa ba ba ne ba mo reeditse e ne ele motho yo o sa kgoneng go tsamaya. O tsetswe ele segole. O ne a ntse mo mebileng ya Lesitara. E ne ele mokopi yo o itsiweng thata. Paulo o ne a bona gore o na le tumelo ya go fola. Paulo o ne a tthatlosa lentswe are: “Ema ka dinao, otlhamalale.” Ke fa a ragoga, a tsamaya. Yare batho ba bona se Paulo a se dirileng ba akanya gore Paulo le Baranaba ke medimo e e fologileng, ya tshwana le batho. Ba ba raya maina ana Zeuse le Hermese (maina medimo a mebedi ya Bagirike). Batho ba ne ba baakanya mokete o mogolo wa go ba tlotla. Ke fa Paulo le Baranaba ba itlhaganela go ba bolella gore gase medimo, ke batho fela. Ba ne ba tlhalosa gore bone ba tlile go rera lefoko la Modimo. (Buisa mo go Ditiro 14:15-17). Jaanong go tla setlhophapha sa Bajuta, yare ba sena go kgona bontsintsi, ba kgobotletsa Paulo ke majwe, ba mo tlogela, ba itlhome a sule. Erile morago ga moo ditsala tsa ga Paulo tsa mo fitlhela a phela ba mo thusa go falola. Ke fa barongwa ba Efangele ba ya kwa Derebe.

Jaanong e ne ele nako ya go wetsa letsholo la bone la ntlha le go simolola leeto la bone la go leba kwa gae. Erile ba le mo tseleng ya go boela morago ba etela Lesitara, Ikonio, Antiogia le Peregá. Ba ne ba rata go ba thusa mo tirong ya bone le go ba rulaganya gore e ne diphuthego. Ba ne ba batla go ba thusa go tlhophá baruti ba ba nang le boikarabelo mo diphuthegong tsena. Ba ne ba tlhoma phuthego mo motseng mongwe le mongwe ba tlhomamisa moeteledipele ele modisa le moruti. Diphuthego tsa Baditshaba di ne tsa tlhomiwa mo bogareng jwa Asiya.

GO BOELA KWA ANTIOGIO

Erile fa ba goroga kwa gae, barongwa ba, ba efangele ba ne ba kgobokanya phuthego mme ba ba bolella dilo tse Modimo o di dirileng ka bone, le gore o buletse Baheitane mojako wa tumelo. E ne e le kgang e e gakgamatsang e ba ne ba e bolella ka ga dingwaga tse pedi tse di telle tsa go dira mo Baheitaneng. Go bonala gore phuthego e ne ya reetsa ka boitumelo pegelo ya baapostolo ba na. Tiro e ne ya simololwa mo Bagiriking ka tsela e kgolo mme Modimo o ne a tlhomamisa tiro ka go e tshegofatsa. Tiro ya borongwa ya ga Paulo jaanong gase sengwe se go akanngwa ka sone fela, jaanong ke selo sa boammaruri se se diregileng. Baheitane ba ne ba itse lorato lwa ga Kresete mme ga ba kitla ba mo lebala. Jaanong Bajuta le Bagirika ke ditokololo tsa mmele wa ga Kresete.

PAULO MORONGWA GO MERAPE E MENGWE

Jaanong re bonye maitemogelo a ga Paulo mo loetong lwa gagwe lwa ntlha lwa lotsholo lwa borongwa. Re ne re na le sebaka sa go bona Paulo a le mo tirong mo thomong ena e kgolo ya gagwe. Tiro ya ga Paulo le Baranaba e ne e le dintlha tse na tse nne tse di tsepameng:

- (1) **E ne ele bareri ba Efengele.** Ba ne ba rerela bontsintsi jwa batho lefoko la Modimo Melaetsa e e ne ya dira thata go gapela batho ba bantsi kwa go Kresete.
- (2) **Tirelo ya bone e ne ele go ruta.** Go ne go sa kgonege go araba dipotso tse dintsi mo kopanong ya batho botlhe. Paulo le Baranaba ba tshwanetse ba bo ba ne ba tsaya diura tse dintsi – Bosigo le motshegare – ba ne ba ruta motho ka mongwe le ditlhophá tsa batho.
- (3) **E ne ele baeletsi.** Tiro ya bone e ne ele go eletsá Bakresete ka bongwe le moo eleng ditlhophá. E ne ele badisa mo tirong ya bone go ba tlhokang tirelo ena.
- (4) **Gape ba tshwanetse go dira jaaka batho ba puso gongwe baeletsi mo dilong tsotlhe tsa go rulaganya phuthego.** Paulo e ne ele

motho yo moshwa mo go direng tiro ena, fela tsela e a ne a e dirisa e ne ya atlega thata moo le gompieno re santseng re e dirisa jaaka mokaedi mo diphuthegong tsa rona. Modimo o ne wa tshhegofatsa Paulo thata mo lotsholong lona lwantlha. Diphenyo tse kgolo di ne di tlaa tla mo lotsholong lena le le latelang.

BOTHATA MO PHUTHEGONG

Erile fa barongwa ba santse ba itapolositse mme ba na le kopano mo Antiogia, ba ne ba utlwa gore go na le bothata jo boholo jo bo ne bo tshosetsa bophelo jwa phuthego. Potso e ne ele gore: A Baheitane e ka nna Bakresete? Re a itse gore Filipi le Petoro ba kile ba dira mo bathong ba Samaria mme ba ne ba amogela ba ba tlabologileng. Petoro o ne a femela tiro ya gagwe ya go gapa Koronelio le Bagiriki ba bangwe kwa Kaisarea. Phuthego e e ya amogela Bakresete ba Bagiriki ba ba mo phuthegong ya kwa Antiogia wa Siriya. Fela erile fa Paulo le Baranaba ba santse ba ile, batho ba simolola go botsa gore a go siame gore Baheitane e nne Bakresete na? Banna bangwe ba ba tswang mo phuthegong ya Jerusalema ba ne ba ya kwa Antiogio go lebagana le bothata jona. Banna ba na e ne ele Bafarisai ba ba ne ba gatella gore Baheitane ba ka se ka ba nna Bakresete fa ba sa rupe. Ka mafoko a mangwe ke gore santlha ba tshwanetse go nna Bajuta pele. Go ne go na le bothata jo bogolo mo Antiogio malebana le kgang ena.

Erile fa Paulo a utlwa ka kgang ena, a bona kotsi ya yone ka bonako. Bothata jona bo ne bo ka kgaoganya diphuthego, le go emisa go gola ga Bakresete. Paulo o ne a tlhagisa maikutlo a gagwe mo potsong ena. O ne a ba bolella gore ga go tlhokege gore motho a rupe gore o tle a pholosiwe.

Go ne ga tseiwa phetso ya gore bothata jona bo isiwe kwa Jerusalema – eseng go amogela taolo, gonne phuthego ena e ne e sena taolo godimo ga phuthego e ngwe – fela e ne ele ka gonne batho ba Jerusalema ba ba tsositseng potso ena mo Antiogio Paulo o ne a batla gore baetapele ba kwa Jerusalema ba tlhagise maikutlo a bone mo tabeng ena gore batho botlhe mo phuthegong ba gololosege.

Mo Jerusalema baetapele ba phuthego ba ne ba Kopana ka fa thoko. Mo kopanong ena Petoro o ne a ba bolella ka fa a ne a neng a rerela moheitane yo o bidiwang Koronelio. Paulo le Baranaba ba ne ba ba bolella ka ga matshego a ba a amogetseng fa ba ne ba tsamaile, ba ile go rerela Baheitane. Phetso e e ne ya tseiwa mo bokhutlong e ne ele phenyo e kgolo go Paulo. Go ne ga tseiwa phetso ya gore go kwadiwe lekwalo le romelwe go diphuthego tsotlhe go kaiwe gore go rupa le meetlo ya Sejuta Baheitane ga ba patelediwe go di dira gore e tle e nne Bakresete.

Ke fa phuthego ya mo Jerusalema e tlhophisa Juta le Silase go boela kwa Antiogio le Paulo le Baranaba. Erile fa ba fitlha phuthegong ya bidiwa go kgobokana go utlwa tsa lekwalo leo. Erile fa lo buisiwa ba lo utlwa ba tlala boitumelo.

Paulo le Baranaba ba ne ba sala mo Antiogio ka nakonyana, ba ruta le go rera lefoko la Morena teng.

THUTO 5

PAULO O SIMOLOLA LETSHOLO LA GAGWE LWA BOBEDI

GO BUISA MO DIKWALONG: Ditiro 16:1-40; 17:1-4

TEMANA YA GO E ITSE KA TLHOGO: *“Tsothe ke di kgona ka ene yo o nthatafatsang, ebong Kriste”* – Bafilipi 4:13.

Jaanong Paulo o ne a itapolositse le go ruta mo phuthegong ya kwa Antiogio, ke fa a gakologelwa tiro ya bone mo Baheitaneng. Mme a raya Barabana are, “Jaanong a re boe, re ye go tlhola bakaulengwe mo motseng mongwe le mongwe o re boletseng lefoko la Morena mo go ona, re bone ka fa ba phelang ka teng.”

Baranaba one a rata gore Johane yo o bidiwang Mareko a ye nabo. Fela Paulo a se ka a dumelana le gore a ye le bone, ka lekau lena le ne la ba tlogela. Ke fa Paulo le Baranaba ba kgaogana. Re utlwa gore Baranaba one a tsaya Johane yo o bidiwang Mareko ba tsamaya ka mokoro go kwa Kipero. Paulo a itlhophela Silase mme ba tsaya loeto lwa bone.

GO ETELA DIPHUTHEGO

Paulo le Silase ba gorogile pele kwa Derebe. Ba fetela kwa pele kwa Lesitara mme ba fitlhela Timothea teng. Timotheo e ne ele Mokresete yo mošha, yo o ne a atlegile thata mo tumelong ya Bokresete, ebile a bontsha gore ke moctapele yo o solofetsang thata. Timotheo e ne ele Moditšhaba, mme o ne a sa rupa. Paulo one a rulaganya gore Timotheo a tsamaye naye mo letsholong lena. Gore go tle go se ka ga nna le ope yo o nyatsang tiro ya bone Paulo o ne a neela Timotheo go rupisiwa. Re itse go le gonyenyane fela ka tiro mo Lisitaria, se re se itseng ke sena.

“Diphuthego tsa tiisiwa jalo mo tumelong, tsa ntsifala mo palong ka letsatsi lengwe le lengwe.”

Eriile fa Paulo a etela Antiogio ya Pisidia, o ne a rulagantse go ya mo tikarolong tse dingwe tsa Asia. Ke fo o a neng a leba kwa bokone go tsena mo Feregia le mo Galatia, moo Paulo le ba ba ne ba na naye ba neng ba rera le go tlhoma diphuthego. Go tloga foo ke fa Paulo a

ikaelela go ya mo tikologong ya Bithinia, fela Moya o o Boitshepo wa ba iletsa go ya teng. Kamoohe, jaanong ba tshwanetseng go ya kwa bophirima. Ke fa Paulo, Silase le Timotheo ba goroga mo Teroase. Ka jalo, Paulo, Silase le Timotheo ba ne ba goroga mo Teroase lobopong lwa lowatle lwa Aegeane.

Bosigo bongwe a le mo Teroase, Paulo o ne a tlhagelwa ke pono. A bona monna mongwe wa Maketonia a eme a mmitisa are a tle lefatsheng leo go tla go ba thusa. Pono ena e ne ele ya boammaruri gore Paulo a be a ikutlwele gore e tswa go Modimo. Ke fa ba ikaelela go tshela lewatle go ya lefatsheng la Yoropa. Go bonala gore Luka o kopanye le bone mo Teroase.

MO FILIPI

Paulo le ba ba nang nae ba ne ba fitlha mo Neapoli mme ba tsamaya dimaele di le lesome go ya kwa Filipi. Yare ka letsatsi la Sabata Paulo a fologela kwa nokeng kwa felong fa Bajuta ba ne ba kopanna teng go rapela. Ke moo ba fitlhetseng setlhopho sa basadi. Mme ba ba rerela. Yo mongwe wa bone e ne ele morekisi wa masela a mahibidu yo o itseng thata. Leina la gagwe e ne ele Ledia. O ne a amogela molaetsa wa baapostola mme ka bonako a nna Mokresete. O ne a supa tumelo ya gagwe ka go kolobediwa mme a thusa ba ntlo ya gagwe go dumela le go kolobediwa. One a kopa barongwa gore ba mo etele mo tlung ya gagwe fa ba ne ba santse ba le mo motseng o o. Kajalo, phuthego ya Filipi e ne ya tlhomiwa mme motho wa ntlha mo Yoropa wa go tlhabologela go Bokresete e ne ele mosadi.

Mosetsana mongwe wa lelata yo o ne a na le moa wa boitseanape a sala Paulo le ba ba nang nae morago letsatsi le letsatsi e le yo a ruilweng ke batho bangwe ba a ne a ba direla khumo e kgolo ka tsa boitseanape. (Buisa mo go Ditiro 16:16-24). Paulo o ne a mo alafa mme a nna Mokresete. Yare beng ba gagwe ba bona gore ga ba kitla ba tlhola ba dira papadi ka ena ba galefa. Ba tlasela Paulo le Silase ba ba isa kwa baatlhoding. Ke fa Paulo le Silase ba iteiwa mme ba latlhelwa mo kgolegong.

MODISA WA NTLO YA KGOLEGLO

Modisa wa kgolegelo o ne a tsenya Paulo le Silase mo kgolegolong mme “a tlapisa dinao tsa bone ka dikota.”

Yare gare ga bosigo Paulo le Silase ba rapela le go opelela Modimo difela, bagolegwi ka bone ba bo ba ba reeditse. Ka tshoganyetso ga nna le thoro mo e kgolo ya lefatshe, moo metheo ya ntlo ya kgolegelo e bileng ya reketla. Ka bonako ke fa mejako yotlhe e bulega, le dikgolego tsa botlhe tsa funologa. Yare modisa wa kgolegelo a thanya mo borokong, mme a bona mejako ya ntlo ya kgolegelo e bulegile a

somola tshaka. One are wa ipolaya a itlhome fa bagolegwi ba tshabile. Mme Paulo a mmita are: “Se ipolae; go nne re fano rotlhe.”

Ke fa modisa wa kgolegelo a lopa dipone, a tlolela mo teng. A wela fa pele ga Paulo le Silase, a roroma. A ba ntshetsa kwa ntle a re: “Barena ke tshwanetse go dirang gore ke pholosiwe? Ba araba bare: Dumela mo go Morena Jesu, mme o tlaa pholosiwa, wena le ba ntlo ya gago.”

Mme ba mmolella lefoko la Morena ene le ba ntlo ya gagwe. Ka yone nako eo ya bosigo modisa wa ntlo ya kgolegelo o ne a tsaya Paulo le Silase mme a tlhatswa dintho tsa bone. A akofa a kolobediwa ene le ba ntlo ya gagwe botlhe. Morago ga moo o ne a isa Paulo le Silase kwa ga gagwe a ba tsholela dijo. A ipela le botlhe ba ntlo ya gagwe ka ba dumetse mo Modimong.

Baathodi ba ne ba lemoga gore Paulo le Silase ke baagi ba Roma. Badiredi ba na ba ne ba lemoga gore ba mo bothateng ka gonne ba otlile baagi ba na ba babedi ba Roma mo pepeneneng. Baathodi ba ne ba tla kwa go bone go ba kopa boitshwarelo. Ba ne ba ba ntshetsa kwa ntle ga ntlo ya kgolegelo. Ba kopa Paulo le Silase go tswa mo motseng oo. Paulo le Silase ba ne ba ya kwa ga Ledia go bona Bakresete le go ba kgothatsa go tswella pele ka tiro mo Filipi.

MO THESALONIKA

Go tloga kwa Filipi, Paulo le Silase ba ne ba ya kwa Thesalonika. Ka matsatsi a mararo a disabata Paulo o ne a rera mo sinagogeng mme a atlega ka go gapela bontsi jwa Bajuta le Bagiriki go tumelo ya Bokresete. Ke fa Bajuta ba boulela mme ba tsosa mathata. Fela le fa go ntse jalo baapostola ba ne ba kgona go tlhoma phuthego e e nonofileng pele ga gore ba kobiwe mo motseng.

Go tswa mo Thesalonika Paulo le Silase ba ne ba ya kwa Berea. Batho ba teng ba ne ba utlwa baapostola mme ba ithuta dikwalo go bona gore a se se reriwang ke banna ba na ke boammaruri na? Bontsi jwa Bajuta le Bagiriki ba ne ba dumela molaetsa mme ya nna Bakresete. Bajuta ba Thesalonika ba ne ba utlwa ka ga katlego ya baapostola. Ba ne ba galefa mme ba ya kwa Berea go ya go ba koba teng. Paulo le Silase ba ne ba tshwanetse go tsamaya, fela Silase le Timotheo, yo o ne a kopana le bone teng, ba ne ba sala mo Berea.

Ditsala dingwe di ne tsa tsaya Paulo go ya lewatleng la kwa Athene. Erile fa ditsala di boela kwa Berea, Paulo a romela molaetsa go Silase le Timotheo a ba bolella gore ba tle Athene ka bonako jo bo ka kgonegang.

THUTO 6

PAULO MO ATHENE LE KORINTHE

GO BUISA MO DIKWALONG: Ditiro 17:15-34; 18:1-17

TEMANA YA GO E ITSE KA TLHOGO: “*Mme golang mo bopelothomoging le mo kitsong ya Morena wa rona Jesu Kriste Morepholosi*” – 2 Petero 3:18.

Athene e ne ele motse o montle thata. E ne ele motse wa ditiragalo tsa lefatshe, kitso, tlabologo, le botlhale. Erile fa Paulo antse a tsamaya mo motseng o a bona motse o tletse ditempele, bonno jwa go obamela, dishrine le medimo ya diseto. Pelo ya gagwe ene ya amega fa a bona dilo tsena tsotlhe. Ke fa a bona aletara e ne e kwadilwe jaana. “**YA MODIMO O O SA ITSIWENG.**” Erile fa a e bona a lemoga gore batho ba na ba batla Modimo o phelang, wa boammaruri. Paulo o ne a sa rulaganya gore o tlile go rera mo Athene. Jaanong o ne a sa kgone go didimala. O tshwanetse go rera boammaruri jwa Morena le Mopholosi wa boammaruri.

PAULO O BUA LE BATHO

Paulo o simolotse go rera mo sinagogeng le mo marekelong. Erile fa a rera molaetsa wa gagwe, batho ba simolola go mo reetsa. Erile morago ga moo a isiwa kwa lekgotleng. O ne a ba bolella gore Modimo wa gagwe o dirile legodimo le lefatshe le gore go Ena go tswa bophelo le nonofo. O ne a tswella pele go ba bolella gore ba tshwanetse go tlabologa le go dumela mo go Morena Jesu Kresete yo o tsogile mo baswing. Erile fa a simolola go bua ka tsogo ya baswi, bangwe ba simolola go tshaga le go mo sotla. Fela bangwe ba ne bare, “*Re tlaa go utlwa gape ka ga dilo tsena.*” Go na le ba bangwe ba neng ba dumela.

MO KORINTHE

Ke fa Paulo a tloga kwa Athene, a ya kwa Korinthe. Korinthe e ne ele motse wa khumo le nonofo. Gape e ne ele motse o o tletseng bolelo. Bajuta ba bantsi ba ba ne ba kobilwe ke mmusi mo Roma ba ne le mo

go ona. Mongwe wa bone e ne ele monna yo o bidiwang Akwila le mosadi wa gagwe yo bidiwang Perisila. E ne ele badiri ba ditente. Ba ne ba simolola kgwebo ya go dira ditente mo Korinthe. Erile fa Paulo a goroga mo Korinthe a bona go tlhokega gore a dire tiro ya gagwe ya bogologolo e a ithutetseng yone, ya go dira ditente go itirela sa go iphedisa. Ke ka moo a kopaneng le Akwila le Peresial ka teng. O ne a nna le bone, mme sabata sengwe le sengwe o ne a ya kwa sinagogeng go rerela Bajuta le Bagiriki. Ka dinako tsotlhe Paulo e ne ele mosupi go batho ba Korinthe. One a itirela ditsala tse dintshwa, o ne a dira tiro ya diatla ka go ikanyega, a rera le go ruta fa a ne ana le sebaka sa go dira jalo.

Paulo o ne a tlala boitumelo fa Silase le Timotheo ba goroga ba tswa kwa Makedonia. Ba ne ba mmolella gore phuthego kwa Thessalonika e nonofile mo tumelong ya yone mo Moreneng. Sena se ne sa naya Paulo mafolofolo ka tiro ya gagwe mo Korinthe.

A SANTSE A LE MO KORINTHE

Tiro ya ga Paulo mo Korinthe e ne ya nonofa thata mme Bajuta ba ne ba simolola go mo tshwenya.

Mathata e ne ele a magolo ke fa Paulo a ba raya are,

“Madi a lona a wele mo ditlhogong tsa lona nna ke itshekile; go tloga jaanong ke tlaa ya kwa baheitaneng.”

Ke fa a tloga a ya mo tlung ya mongwe yo o bidiwang Titio Juseto ntlo ya gagwe e bapile le senagoge. Kerisepo molaodi wa senagoge a dumela mo Moreneng le botlhe ba lapa la gagwe. Ba bantsi ba dumela mme ba kolobediwa.

Bosigo bongwe Paulo o ne a amogela pono ya go mo tlhomamisetsa gore o sireletsegile le gore wa tsamaisiwa. One a nna dikgwedi di le lesome le boroba bobedi, “A ba ruta lefoko la Modimo.”

Erile fa Galeo e nna molaodi, Bajuta ba leka go koba Paulo mo Korinthe. One a isiwa kwa lekgotleng fa pele ga Galeo. Bajuta ba ne ba mo latofatsa ka gore o ruta kgatlhanong le melao ya Bajuta. Galeo o ne a ba bolella gore ga a seke melato ya dilo tsa borapedi. Lekgotla le ne la phatlalla mme Bajuta ba ne ba kobelwa kwa ntle.

Paulo o ntse mo Korinthe dingwaga tse pedi. One a kgona go dira go le gontsi mo motseng ona o o bosula. Jaanong ke nako ya gore a boele gae. Jaanong e ne ele nako ya gore Paulo a lemoge gore o tshwanetse go thusa diphuthego gore di tlhomame di nonofe. Mme ka yone nako eo o ne a kwala lekwalo la gagwe lantlha go Bathessalonika.

LEKWALO LANTLHA LA GA PAULO

Paulo o dirile dingwe tsa ditiro tsa gagwe tse di bothokwa ka go kwala makwalo. Makwalo ana a ne a le bothokwa eseng fela go diphuthego tsa nako eo, le mo diphethengong tsa rona tsa gompieno a bothokwa thata go re kaela. Makwalo a ga Paulo e ne ele:

- (1) Bathesalonika 1 le 2. A kwadilwe ka ngwaga wa 52-53 A.D. (morago ga Kresete). Makwalo ana a ruta ka ga go tla ga Kresete lwa bobedi.
- (2) Bakorinthe 1 le 2, Bagata, le Baroma, a kwadilwe ka ngwaga wa 55-58 A.D. Makwalo ana a re ruta gore re amogela pholoso ka tumelo mo go Kresete.
- (3) Bafilipi, Filemone, Bakolose le Baefeso a kwadilwe ka ngwaga wa 60-63 A.D. Makwalo ana a re ruta ka ga Kresete le botho jwa gagwe.
- (4) Timotheo 1, Tito le Timotheo 2 a kwadilwe ka ngwaga wa 65-67 A.D. A re ruta gore diphuthego di tshwanetse go dira jang ka mathata a diphuthego le a baruti.

Ka go ithuta makwalo ana re bona a mangwe a mathata a diphuthego tsa ntlha di ne di lebagane le one. Mathata ao e ne ele ana:

- (1) Ba ne ba sena meago ya phuthego. E nnile morago ga dingwaga mo Bakresete ba neng ba nna le meago ya bone ya go obamela. Ba ne ba tshwanetse go kopanela mo matlung. Gantsi ba ne ba kopana mo magayeng, gongwe mo mabaleng gongwe mo ntlung lefalafala e ba e duellang.
- (2) Sontaga e ne ese letsatsi la go ikhutsa ka molao. Ditokololo tsa phuthego di ne di tshwanetse go ya tirona ka letsatsi la go obamela. Nako ya go obamela e ne ele phakela mo mesong gongwe maitseboa morago ga go wetsa tiro ya letsatsi leo.
- (3) Ba ne ba sena bathusi ba go obamela ba re nang le bone gompieno. Ba ne ba sena di Beile tse di dirisiwang ka kakaretso. Ba ne ba sena dikopelo le dikwalo tse dingwe tse re nang natso.
- (4) Ba ne ba sena badiri ba ba katisitswe gongwe baetapele. Ba ne ba ikaegile ka moruti yo o sa katisiwa le moreri yo o sa katisiwa. Fa ese ka nako e o Paulo, Timotheo, le Silase ba ne ba na nabo.

Paulo o ne a tsamaile dingwaga di le tharo, mme o ne ale mafolofolo go boela kwa Antiochio. Paulo o tlogile Korinthe a na le Akwila le Perisila. O ne a ema mo Efeso mme a rera molaetsa wa ga Kresete. Ke fa a tswella pele a etela Jerusalema nako e khutshwanyane mme a ya kwa Antiochio. O ne a kgona go ba pegela ka moo Morena a tshagofaditseng tiro ya bone ka tsela e gagamatsang mo Baheitaneng ba ba mo bophirima.

THUTO 7

LETSHOLO LA BORARO

GO BUISA MO DIKWALONG: Ditiro 20:17-35

TEMANA YA GO E ITSE KA TLHOGO: “*Se lapeng go dira tse di molemo*”—2 Bathesalonika 3:13.

Paulo o ne ana le nako e khutshwanyane a le mo Antiogio, ke fa a utlwa dikgang tse di reng go na le bothata mo diphuthegong mo Galatia. Mme a simolola letsholo le le thata, le le telle la boraro.

Kwantle go Efeso kwa a ntseng teng nako e telle, le go etela kwa Illirikume, bontsi jwa nako ya gagwe mo letsholong lena o ne a etela mafelo a a kileng a dira mo go o ne.

PAULO O NE A RUTA DIPHUTHEGO

Mo matsholong a gagwe a ntsha a mabedi Paulo o ne a dirisa bontsi jwa nako ya gagwe go gapela batho kwa go Kresete. Fela erile ka letsholo la gagwe la boraro, Paulo o ne a bona go tlokega gore a dirise nako ya gagwe go dira se sengwe. Bakresete mo Jerusalema ba ne ba tshwenyega ka gone dijo di ne di tlhela mme ba sa kgone go bona ditiro.

Ka moo Paulo o ne a kopa diphuthego tsa Baditshaba go neela thata, go thusa Bakresete ba Jerusalema. Re a itse gore sena e tlaa nna tshegofatso go ba ba neelang le ba ba amogelang. Paulo o ne a dirisa bontsi jwa nako ya gagwe go ruta le go tlhalosa thuto ya ga Kresete. Bakresete ba Bajuta, ba ba ne ba ikutlwela gore motho o tshwanetse go nna Mojuta pele ga gore a nne Mokresete, ba ne ba gasitse dithuto tsa maaka, mo diphuthegong. Tota bontsi jwa Bakresete ba Baditshaba ba ne ba tshwenyegile thata ka lebaka lena moo ba bantsi ba ne ba tlogela tumelo ya Bakresete. Gape go ne gona le diphuthego tse dingwe tse di ne di ngangisana ka ga dilo tse Bakresete ba di dumelang. Paulo o ne a lemoga gore o tshwanete go ruta le go katisa diphuthego tsena gore di tle di eme mmogo, di nonofe mo tumelong ya ga Kresete. Ene e tlaa nna boikarabelo jwa diphuthego tsena go gasa Efangele mo lefatsheng lotlhe, mme fa ba ne ba kgaoganyane ba ne ba ka seka ba nna le nonofo ya go bolela molaetsa wa ga Kresete. Ka nako ya letsholo lena Paulo o kwadile makwalo a le mane a ruta batho ka ga tsa tumelo ya Bakresete.

TSE PAULO A NE A DI RUTA

Paulo ke moranodi wa rona wa ntlha yo mogolo wa Efangele ya ga Kresete. O ne a na le boikarabelo jwa go bopa tsamaiso e e boelang gore Bokresete ke tsela ya bophelo. Tsena ke dingwe tsa dilo tse Paulo a ne a di ruta, le gompieno re sa di ruta mo diphuthegong tsa rona:

- (1) Motho o paletswe go siamo ka boena; ka moo he, o palletswe gore a ka tshwanelwa ke molemo wa Modimo. Rona rotlhe re paletswe go fella; ga go na ope wa rona yo o ka phelang bophelo yo bo felletseng.
- (2) Ere ka motho a pallwa ke go fella, a sa kgone go ipholosa. Ke ka moo Modimo o mo diretseng pholoso. Ke kantlha ya bopelotlhomogi le lorato lwa Modimo, fa a re diretse pholoso. Fela ga go se motho a se direleng go e bona. Pholoso ena ke neo ya Modimo mme botlhe ba ba e amogelang ba bona kagiso le molemo wa Modimo. Neo ena ke ya batho BOTLHE e ka amogelwa ka tumelo fela.
- (3) Kresete ke Morekolodi wa batho. Ke Kresete fela yo o kgonang go golola batho mo bokgobeng jwa boleo. Yo o amogelang tshiamo ena ka tumelo mo go Kresete e nna ngwana wa Modimo. Fela o santse a na le tlholego ya boleo e e tshwanetseng go nna ka fa tlase ga taolo. Ka bopelotlhomogi jwa Modimo, o tshwanetse go fenyha boleo. Mme phenyo e a tlhomamisiwa. Boleo bo tlaa fengwa! *“Le fa e ka nna loso gongwe bophelo gongwe baengele gongwe balaodi gongwe dilo tse di leng teng gongwe tse di tlaa tlang gongwe dithata gongwe bogodimo gongwe boteng, le fa e ka nna sebopi se sele, ga di kgone go ka re kgaoganya le lorato lwa Modimo lo lo mo go Kriste Jesu, Morena wa rona.”*
- (4) Kresete ke setlhogu le kgalalelo ya leano lena la Modimo la go rekollwa. Jesu Kresete ke Mopholosi wa batho bolthe. Ga gona tsela e ngwe ya go ya bophelong fa ese ka Ena. O tsile mo lefatsheng go pheta le go swa gore re tle re amogele phosolo. Ga gona tsela e ngwe. Fela jaaka go ne go sena tsela e ngwe ya gore Kresete a ka pholosa batho fa ese ka loso lwa gagwe mo sefapanong, go ntse fela jalo le go rona. Ga go na tsela e ngwe fa ese ka Morena le Mopholosi wa rona Jesu Kresete. Kresete ke tlhogo ya phuthego. Gompieno Moya o o Boitshepo wa ga Kresete O agile mo go rona gore re kgone go phela ka nonofo le thata ya Modimo.

MO EFESO

Paulo o ntse dingwaga tse tharo mo Efeso. Efeso e ne ele motsemogolo wa Asiya. Ke nako e telle thata e Paulo a kileng a e nna mo bonnong.

Tempele ya ga Aretemise (modimo wa mosadi wa Bagiriki) e ne ele e ngwe ya ditempele tse di ntle thata mo lefatsheng. E tsere dingwaga di le magolo a mabedi le masome a mabedi go e aga. Kobamelo ya teng e ne ele bosula ka gotlhe. Go lne go tla dibete tsa batho go tlaa go obamela Aretemise. Sena se neile Paulo sebaka sa go rera Efangele go batho ba na. Erile morago ga dikgwedi di se kae ba bantsi ba batho ba na ba ne ba amogela Kresete mme ba gana go obamela Aretemise.

Paulo o rutile dikgwedi tse tharo mo sinagogeng. Ke fa Paulo a hira sekolo sa Tirannuse dingwaga tse pedi tse di latelang.

Tiro ya ga Paulo mo Efeso e ne ele e e atlegileng thata mo tirelo ya ga Paulo. Re bolellwa gore botlhe ba ba nngang mo Asiya ba ne ba utlwa lefoko la Morena, Bajuta le Bagiriki.

Batho ba bantsi ba ne ba amogela tumelo ya Bokresete ke fa balatedi ba ga Aretemise ba simolola go tshwenya Paulo mme Paulo a tshwanela go falotsa bophelo jwa gagwe.

GO ETELA MAKEDONIA

Paulo o tlogile mo Efeso, a boela kwa Makedonia moo a etetseng diphuthego tse di ntshwa teng. O ne a rera sebakanya mo Teroase ke fa a fetela kwa Filipi mo o a kopaneng le Timotheo le Tito. Phuthego kwa Filipi e ne e nonofa. Paulo o kwadile lekwalo la ntlha go Bakorinthe a le fano. Erile morago ga nako e khutshwanyane ke fa a kwala le la bobedi go Bakorinthe.

Kea Paulo a emeng teng morago ga moo ke kwa Illirikume. O ne a rera teng dikgwedi tse pedi gongwe tse tharo pele ga gore a tswelle pele go ya kwa Korinthe.

Batho bangwe ba Korinthe ba ne ba itumella go nna le Paulo. Erile fa Paulo a le mo motseng ona o ne a ruta le go katisa baetapele. Lebaka le lengwe la gore Paulo aye kwa Korinthe e ne ele go ya go kgothatsa Bakresete go abela phuthego ya Jerusalema go go lekanyeng. Erile fa Paulo a le mo Korinthe ke fa a kwala lekwalo la Bagalata le lengwe la makwalo a magolo a gagwe, le lekwalo la Baroma.

Jaanong Paulo o ne a le mafolofolo go boela a simolola mo Jerusalema le Antiogio. O ntse a se o dingwaga tse nne jaanong o tshwanetse go bo a tshwenyegile ka boemo jwa diphuthego tse a simolotseng go dira mo go tsone. Gape o ne a le mafolofolo a go isa dikatso tse a di kgobokantseng mo lotsholong lena kwa Jerusalema.

Paulo le ba a nang nabo ba ne ba ikaelela go tsamaya ka mokoro go ya Jerusalema. Mme o ne a utlwa gore Bajuta ba logile leano la go mmolaya fela fa mokoro o tswa mo lewatleng. Ke fa Paulo a fetola leano la gagwe. Ena le Luka ba ne ba tsaya leeto le le telle, le le thata la go tsamaya mo lefatsheng. Paulo o ne a ema mo Teroase moo a ne a

kopana teng le Bakresete ka letsatsi lantlha la bcke. Ba ne ba setse ba tshegetsatsi letsatsi la sontaga jaaka letsatsi la go obamela. E ne ele ka nako ena fa Eutigo yo o ne a ntse fa fenstereng, a tlaa tshwarwa ke boroko mme a wa a le kwa tlung ya boraro, a wela fa fatshe. Ditsala tsa gagwe di ne tsa tabogela kwa go ena mme ba fitlhela a sule. Paulo o ne a mo tsosa mme a boela a phela.

Ka letsatsi le le latelang ke fa Paulo a tloga mo Teroase a tsamaya ka dinao go ya kwa Aso me ba ba ne ba tsamaya nae ba ne ba tsamaya ba ne ba tsaya mokoro go ya kwa Mileto. Paulo o ne a rera teng.

Paulo o ne a tswellapele pele ka leeto la gagwe la go ya Jerusalema. Nako ngwe fa a ne a ema mo motseng Bakresete ba ne ba mo tlhagisetsa ka ga kotsi e e fa pele ga gagwe. Bajuta ba ne ba ikaeletse go mmolaya. Paulo o ne a tswellapele go ya Jerusalema a itse gore o na le thomo e a tshwanetseng go e wetsa. O ne a wetsa letsholo la gagwe le legolo go Baheitane. O fentse ntwa ya bone, jaanong o ikaeletse go lebaga le sengwe le sengwe se se ka mo tlelang.

THUTO 8

PAULO MO JERUSALEMA

GO BUISA MO DIKWALONG 21:27-40

TEMANA YA GO E ITSE KA TLHOGO: *“Bakaulengwe bame, ke fetsa ka go re: Thatafalang mo Moreneng le mo thateng ya bonatla jwa gagwe”* – Baefeso 6:10.

Kwa bokhutlo Paulo o ne a goroga Jerusalema morago ga dingwaga tse nne tse di tlele. Bakresete ba ne ba tlala boitumelo go bona Paulo gape. Ba ne ba tlhoafalela go utlwa ka tiro yotlhe e Paulo a e dirileng le gore Moya o o Boitshepo o kgonne go dira eng ka ena mo dingwageng tse.

Baetapele botlhe ba Jerusalema ba ne ba kgobokana go reetsa pegelo ya ga Paulo. O ne a bolela ka botlalo tsotlhe tse Modimo o di dirileng mo Baheitaneng ka tirelo ya gagwe. Baeteledipele erile ga ba utlwa ba amega mme ba galaletsa Modimo ka tsotlhe tse di dirilweng.

E ne ele ka yone nako ena fa Paulo a ba naya dikatso tse a di kgobokantseng ka boikanyego mo dingwageng tse nne tse di fetileng, fa a ne a dira mo diphutheng tsa Baditšhaba.

BOTHATA GO TSWA GO BAJUTA

Go ne go na le Bajuta ba bantsi ba ba dumetseng mme ba latela molao. Ba ne bare Paulo o ruta Bajuta ba ba nnang mo go Baditšhaba go fularela molao wa ga Moše le gore ba se rupise bana ba bone le eseng go tsamaya ka fa mekgweng ya rona ya bogologolo. Ene ese boamaruri se ba se buang, fela baetapele ba diphuthago tsa Jerusalema ba ne ba eletsa Paulo go tsaya banna ba le bane, ba ba nang le kano ya go utlwa molao, a ye le bone Tempeleng e itshekisiwe le bone.

Paulo o ne a dira se ba mo eleditseng go se dira. Fela erile Bajuta ba mmona mo Tempeleng ba feretlha bontsi, bare Paulo o tlišitse Bagerika mo Tempeleng. Moditšhaba o ne a sa dumellwa go tsena mo Tempeleng ya Bajuta. Paulo o ne a sa dira jalo, fela ba ne ba gasanya taba eo ya gore Paulo o dirile jalo. Ke fa bontsi jotlhe, bo tshwara Paulo bare, “Banna ba Iseraele! thusa! thusang!” Motho yo ke ene yo o rutang kgatlhanong le tempele le go e itshepolola (wa e kgotlela) ka go tliša Baditšhaba mo go yone!

Paulo o ne a tshwarwa a swatolelwa kwa ntle ga Tempele mme ka bonako mejako ya tswalwa.

Erile ba sa ntse ba leka go mmolaya, molaodi wa masole wa Roma a utlwa gore go na le khuduego mo Jerusalema.

KGOLEGO YA GA PAULO

Molaodi o ne a tshwara Paulo mme a laola gore a golegwe ka dikeetane tse pedi, a botsa bontsi jwa batho gore Paulo ke mang le gore o dirile eng.

Mme bangwe mo bontsing ba kua se, ba bangwe se sele. Yare ka a retelelwa ke go lemoga ka tlhomamo kantlha ya pheretlhego, a laela gore Paulo a isiwe mo kagong ya batlhabani.

Yare ba fitlha mapalamong, batho ba galefa thata gore batlhabani ba bo ba tshwanela go rwala Paulo go mo sireletsa. Bontsi jwa batho bo ne bo kua bore: "A a bolawe! A a bolawe!"

Erile fela pele ga gore ba tseye Paulo ba mo ise mo kagong ya batlhabani ke fa Paulo a kopa molaodi gore a a ka bua sengwe go morafe. Molaodi o ne a gakgamala fa a utlwa Paulo a bua ka Segerika. Ke fa Paulo a simolola go bua le morafe ka shebera.

(Buisa mo go Ditiro 22:1-21). Erile fa Paulo a bua sengwe ka ga "Baditšhaba" bontsi jwa batho jwa gakala mme ba re a bolawe ka bonako. Ba ne ba ikaeletse go mmolaya mme molaodi a ba thibela. A tsaya Paulo a mo isa ka mo gare a laela gore batlhabani ba mmotso-lose ka thupa gore a tle a ipobole tshenyo ya gagwe. Molaodi o ne a rata go itse gore ke goreng fa bontsi bo mo galefetse.

Yare ba bofa Paulo, Paulo a ba raya are, "A lo letleletswe go seola motho eleng moagi wa Roma. Erile fa molaodi a utlwa gore Paulo ke moagi wa Roma a boifa mme a mo tsaya a mo isa lekgotleng la Bajuta.

FA PELE GA LEKGOTLA LE LEGOLO

Paulo o ne a setse a kile a tliša Bakresete ba bantsi fa pele ga lekgotla lena le legolo (ke kgotlatshekelo e kgolo ya Bajuta) ya go sekisa. Jaanong ke ena yo o leng fa pele ga lekgotla lena. Gongwe mo bontsing jo o o ne a leba kwa le kwa mo kgotleng ena go bona ga go sena tsala ele ngwe fela ya gagwe mo go bone. Paulo a bolella lekgotla gore o phetse fa pele ga Modimo ka segakolodi se se siameng. Ke fa moperisita yo mogolo, Anania, a laela mongwe yo o emeng foo go itaya Paulo mo molomong. Sena se ne sa galefisa paulo mme a bua le Anania ka bogale. Fele Paulo o ne a ikwatlhaya, ka go nne a ne a sa itse gore Anania ke moperisiti yo mogolo.

Ke fa Paulo a lemoga gore ba bangwe mo go bone ke Bafarisai, mme ba bangwe ke Basadukai. One a itse gore ke dira. Ke fa Paulo a

kua are, “Banna ba ga etsho, ke Mofarisai ngwana wa Bafarisai.” Sena se ne sa tsosa kgang mo ditlhopheng tsena tse pedi. Ke fa molaodi wasekete a tlosa Paulo ka a boifa gore o tlaa gagolwa ke bone; Paulo o ne a falola loso gape.

Mo bosigong joo Morena a etela Paulo mo kgolegolong. Morena o ne a mo raya are, “Nametsega, Paulo; gonne o tshwanetse go bolella batho ka nna kwa Roma fela jaaka o ba boleletse ka nna mo Jerusalema.” Jaanong Paulo o ne a itse gore o tlaa kgona go ya kwa Roma, fela o ne a sa itse gore o tlaa tsaya nako e e kanakang le gore go tlaa direga jang.

O PHOLOSITSWE GO TSWA JERUSALEMA

Erile Paulo a sena go ba palla ka puo, ke fa Bajuta ba ikaella go mmolaya. Ba dumelana ka ikano ya gore ga ba kitla ba a ja le eseng go nwa ba ise ba bolae Paulo. Motlogolo wa ga Paulo o ne a utlwela talelo ena ya go bolaya Paulo. Mosimane yo o ne a bolella molaodi wa lekgolo ka ga taelo ya go bolaya Paulo. Ke fa molaodi wa lekgolo a laela batlhabani ba le makgolo a mabedi, le bapalami ba dipitse ba le masome a supa go isa Paulo go Kaisarea. Fa a le kwa Kaisarea, Paulo one a isiwa go Felekise mme a tsengwa kwa ntlung ya bogosi ya ga Herote. Paulo o ne a falola gape mo losong. Paulo o ne a tshwanela go nna mo kgolegong mo Kaisarea dingwaga tse pedi, jaanong e ne ele dingwaga tse tharo gape go feta pele ga gore a gololwe.

Ke goreng fa Paulo a tshwanetse go nna dingwaga tse tlhano mo kgolegong mo nakong ena ya bothlokwa mo tirelong ya gagwe? Ga re kgone go ka araba potso ena ka botlalo. Go tshwanetse ga bo go ne go le thata go Paulo go ka tlhaloganya, fela jaanong re a bona gore ke ka lebaka la eng. Paulo o ne ja tshwanetse go ikhutsa.

Paulo o tshwanetse a bo a ne a lapile thata morago ga dingwaga tse masome a mabedi tsa go dira tiro e e bokete le go tsamaya thata. Gase fela gore e ne ele nako ya go itapolosa, fela o ne a na le nako ya go akanya ka boammaruri jwa ga Jesu Kresete. Erile morago fa Paulo a kwalela Bafilipi ka ga kgolego ya gagwe a bua jaana:

“Ke rata gore lo itse sena, bakaulengwe ba ba rategang, eleng gore sengwe le sengwe se se ntlhagetseng e nnile go tsweletsa pele Efangele ya ga Kresete. Gonne gongwe le gongwe mono le batlhabani mona ba itse gore ke mo dikgolegong ka go nne ke le Mokresete.”

THUTO 9

PAULO FA PELE GA FESETO

GO BUISA MO DIKWALONG: Ditiro 16:1-32

TEMANA YA GO E ITSE KA TLHOGO: *“Bonang he, jaanong ke nako ya go amogelwa sentle; bonang jaanong ke letsatsi la pholoso”*
– 2 Bakorinthe 6:2.

Tsheko ya ntlha ya ga Paulo e ne ele fa pele ga Felekise. Felekise e ne ele molaodi yo o setlhogo le yo o sa siamang. Balatofatsi ba ga Paulo e ne ese Bajuta ba mo Asiay, fela e ne ele Bajuta ba Jerusalema. Ba ne ba thapile moemedi wa Roma leina la gagwe e ne ele Teretuluse. Teretuluse o ne a simolola puo ya gagwe fa pele ga lekgotla ka go baka Felekise moeteledipele yo o setlhogo. Ke fa a tlhagisa dilo tse pedi tse a latofatsang Paulo ka tsona.

- (1) Paulo ene tokololo ya setlhopa sa maitirelo sa Banasaretha.
- (2) O kgotletse Tempele.

Paulo o ne a sena moemedi, fela o ne a tlhagisa mafoko a gagwe a go iphemela ka kitso ya boammaruri. O ne a bontsha gore ga a ise a kgotlele Tempele. O ne a ba bolella gore ke Mokresete le go ba bolella gore sena ke “bodumedi jwa Bajuta jwa boammaruri” Paulo one a fenywa molato wa gagwe mme o ne a tshwanetse go gololwa. Fela Felekise o ne ja boifa baetapele ba Bajuta, a busetsa phetso ya gagwe kwa morago mme a mo nnisa mo kgolegong.

FA PELE GA FESETO

Felekise e ne ele molaodi yo o sa siamang thata moo mmusi Nero a neng a mo tlosa mo boemong jwa go etapele. Porekuse Fesetose ene ya nna molaodi. Fesetose o ne a le botoka thata a phala Felekise. Ka gone Festose e ne ele molaodi yo moshwa, Bajuta ba ne ba tlisa molato o ba nang nao kgatlhanong le Paulo gape. Fesetose o ne a ya kwa Jerusalema go tshwara kopano le Bajuta teng. Ba ne ba kopa gore Paulo a busediwe kwa Jerusalema go tla go sekela teng. Ba ne ba santse ba ikaeletse go mmolaya. Feseto o ne a gana go dira se ba se kopang mme a ba letlella go tsella pele ka molato wa bone mo kaisarea. Ke ka moo Paulo a neng a sekisiwa gape kgetlo la bobedi. Ka lekgotlo lena o ne a tlisiwa fa pele ga Feseto.

Bajuta ba ne ba latofatsa Paulo ka gore o tsosa pheretlho mo Bajuteng, le go obamela Modimo ka maaka, le go leka go diga puso ya bone. Feseto o ne a sa itse dilo tse na ke fa a tlhagisa gore molato ona o isiwela lekgotleng le legolo la Bajuta. Paulo o ne a itse gore ga a kitla a bona phatlha fa a ka ya go Bajuta mo Jerusalema. Paulo e ne ele moagi wa Roma mme o ne a letleletswe go gana le go kopa gore molato wa gagwe o tliwise fa pele ga mmusi. Ke fa Paulo a raya lekgotla are: "Ke ikuela go Kaesara" Sena se ne sa gagamatsa Feseto fela go ne go sena sepe se sengwe se a ka se dirang. O ne amogela boikuelo jona. Ke fa are: "O ikuetse go Kaisara, o tlaa ya go Kaesara".

FA PELE GA AGERIPA

Phetogo mo molatong o o tlhagisitsweng fa pele ga Feseto e ne e gagamatso. O ne a sena molato kgatlhanong le Paulo. Go romela molato go Kaesara o o senang se motho a latofadiwang ka sone go ne go tlaa dira Feseto seelele. Gape gongwe one a ka latlhegelwa ke maemo a gagwe a go nna molaodi. Heroda Ageripa wa bobedi le kgaitadie ba ne ba etitse Feseto ka nako eo. Go ne go tshwanela go ka direla baeng sengwe sa go ba itumedisa. Feseto o ne a akanya gore go sekisa mogolegwa ona e ka nna sengwe sa go ba itumedisa. Gape e ne ele ka go nne Ageripa a ne a itse melao ya Bajuta le meetlo ya bone. Feseto o ne a a kanya gore gongwe Ageripa a ka mo thusa go rulaganya molato o a ka o romelang le Paulo fa a mo romela kwa Roma. Go ne ga baakanyediwa lebaka lena le legolo. Paulo o ne a tliwise fa pele ga phuthego. Ageripa o ne ja tshwere kopano. Ke fa Paulo a simolola go bua. O ne a ba bolella ka ga maitemogelo a gagwe go tloga ka nako eo Jesu a neng a bua nae a le mo tseleng ya go ya Damaseko go fitlha ka nako eo. Ke fa a simolola go rera Jesu Kresete ka tsholofelo ya go gapela mmusi go Kresete. Feseto, Ageripa le ba bangwe ba ne ba amega thata. Ageripa o ne a amega moo a neng are, "Paulo o batlile o ntira Mokresete ka nako ena" Baetapele botlhe ba ne ba dumelana gore Paulo ga a dira sepe se se tshwanetseng loso. Fela Paulo ga aka a gololwa.

GO TSAMAYA KA MOKORO GO YA ROMA

Erile morago ga matsatsi a se kae a sena go seka fa pele ga Ageripa, ke fa Feseto a simolodisa Paulo leeto la gagwe la go ya kwa Roma. Paulo le bagolegwi ba bangwe ba ne ba disitswe ke molaodi wa lekgolo yo leina la gagwe eleng Juleo. Luka le Aristrarego ba ne ba tsamaya le Paulo. Ba ne ba simolola go ya kwa Asiya ya Roma ba ikamile ka lewatle. Yare kamoso ba fitlha kwa Sitone, mme Paulo a letlellwa go ya lobopong lwa lewatle go etela ditsala mo motseng. Yare go tloga teng ba tsamaya ka mokoro go ya bokone jwa Kiperi mme raya kwa Mira mo Lekia. Ke moo ba neng ba palama mokoro o o

tihamallelang kwa Italia. Yare ba sena go tsamaya malatsi a se kae ba fitlha kwa felong fa go bidiwang Magorogelo-mantle setlhake-tlhakeng sa Kereta. Ka e ne ele nako ya diphefo tse di kgolo, Paulo o ne a ba gakolola go nna foo go fitlha e feta. Fela bontsi mmogo le molaodi le monga mokoro ba ne ba ikaella go fitlha kwa Fenikise pele ga gore ba emele mariga.

GO ROBEGA GA MOKORO KWA MALETA

Erile fa ba tloga ka mokoro go tswa kwa Magorogelong-mantle ba ikaelela go nna gaufi le lewatle mme ba solofela go fitlha kwa Fenikise ka diura di se kae. Fela phefo e e nonofileng ya tsoga ya ba kgweletsa mo setlhakenyaneng se se bidiwang Kelauta. Ba ne ba ema nakonyana fela e e lekanyeng go tiisa mokoro.

Ga ba ka ba nna mo ba ne ba le teng gonne phefo ene e tlaa ba kgweletsa mo mmung wa Afrika. Ba ne ba simolola go latlhela dithoto le didiri tsa mokoro mo lewatleng gore mokoro o se nne bokete. Malatsi a mantsi maru a ne a bipile letsatsi le dinaledi gore batsamaisi ba mokoro ba se ka ba itse fa ba le teng. Bokhutlong ba ne ba latlhegelwa ke tsholofelo ya go ka falola.

Ke fa Paulo a bua le bone are: “Banna, fa lo kabo lo ntheeditse, lwa se ka lwa tloga mo Kereta, lo kabo lo sa bone tlalele e le tshenyegelo ena. Fela jaanong go siame, re tlaa bolokega. Go nne bosigo jona ke bone moengele wa Modimo, a nthaya are, ke tshwanetse go ema fa pele ga Kaisara; mme itse gore Modimo o tlaa pholosa botlhe ba ba etang nao mo mokorong.”

Matsatsi a le lesome le bone mokoro o ne o kgarakgatsega go ya kwa le kwa. Erile bosigo bongwe ke fa bodiri-mokorong ba lemoga gore ba atamela lefatshe. Ba ne ba digela dikgoge di le nne gore mokoro o se ka wa thula mafika. Ba ne ba ema foo gore bo be bose, ba emetse lesedi la letsatsi.

Bangwe ba badiri-mokorong ba ne ba sa rate go emela gore bose. Ba ne ba rata go ngwega mo mokorong o mogolo go ya go o monyenyanane. Erile fa Paulo a ba bona a ba are: “Fa ba, ba ka tlogela mokoro, ga lo kake lwa phologa.” Ka moo badiri-mokorong ga ba ka ba letlellwa go tsamaya.

Paulo o ne a ba solofetsa gore go gona ope yo o tla ultwang botlhoko. Ke fa a tsaya senkgwe, a leboga Modimo. Ba ne ba ja botlhe mme ba leboga.

Fa bo sena go sa, ba latlhela dikgoge ba leka go isa mokoro kwa losing, fela o ne o tshwerwe ke mmu.

Batlabani ba ne ba ikemisetse go bolaya bagolegwi esere gongwe ba ngwega. Fela molaodi wa lekogolo a seka a ba letlella go dira jalo. O ne are: “Botlhe ba ba itseng go thuma ba itatlele pele mo

lewatleng, gore ba fitlhe kwa lefatsheng. Fa o sa kgone go thuma ithuse ka dipati mme lo falolele kwa lefatsheng.”

Mme botlhe ba ne ba fitlha lefatsheng mo setlhakeng se se bidiwang Maleta. Go ne go le serame, mme ba nna ba ne ba gotsa mollo. Yare Paulo a sena go rwalela ngata ya dikgong le go di baya mo mollong ga tswa noga, ya mo palama letsogo. Ke fa mongwe are: “Ruri motho yo ke mmolai, le fa a falotse mo lewatleng, pusoloso ga e mo leseletse go phela.”

Paulo o ne a tlhotlhorela noga mo mollong. Batho ba bo ba lebeletse gore letsogo la gagwe le tlaa ruruga, gongwe a wele fa fatshe, a swe ka bonako.

“Ke modimo!” ba ne ba rialo ba seba.

Jaanong Pubilio monna yo mogolo wa setlhake seo o ne a re tshola mo tlung ya gagwe. Paulo o ne a lemoga gore rraago Pubilio o lwala thata, a tshwerwe ke go fisa le go tsholola madi. Erile fa Paulo a mo rapella Modimo wa mo fodisa. Ka bonako ba bangwe ba tliša balwetsi ba bone go Paulo go fodisiwa.

Erile morago ga kgwedi tse tharo ke fa Paulo le ba bangwe ba tloga ba ya Roma. Batho ba setlhake-tlhakeng seo ba ba abela dineo le tse ba ditlhokang. Dikgang tsa fitlha kwa Roma ka bonako tsa gore Paulo o e tla.

THUTO 10

PAULO MO ROMA

GO BUISA MO DIKWALONG: Ditiro 28:16-31

TEMANA YA GO E ITSE KA TLHOGO: *“Gonne mo go nna go phela ke Kriste, go swa ke letlotlo”* – Bafilipi 1:21.

Mokoro wa ga Paulo o ne wa ema mo lobopong lwa Napele, bokgakala jwa lekgolo le masome a mane a dimaele go tswa mo Roma. Paulo o ne a itumela thata fa a kgatlhantshiwa ke ditlhophha tse pedi tsa ditsala tsa Bakresete dimaele di le masome a mane go tswa mo Roma. Ba ne ba tsamaya ka dinao go ya kwa Roma.

Jaanong Paulo o gorogile mo motsengmogolo wa puso ya Roma. Roma e ne ele motse o botlhokwa mo lefatsheng ka nako eo.

GO GOLEGWA GA PAULO

Erile fa ba fitlha mo Roma bagolegwi botlhe ba ne ba le mo kgolegelong, Paulo ena o ne a letlellwa go nna a le nosi. Ka lebaka lengwe Paulo o ne a neiwa tshiamelo e e kgethegileng. Paulo o ne a bofeletswe go molaodi wa bafemedi, fela o ne a letlellwa go nna mo ntlung ya gagwe kgakala le kgolegelo. One a letlellwa go tshola ditsala tse di mo etelang ka dinako tsotlhe.

Gone go na le Bajuta ba bantsi ba ba nnang mo Roma. Erile morgo ga matsatsi a mararo Paulo a sena go goroga a phutha baetellipele ba Bajuta. Mme a ba bolella tsotlhe tse di mo tlhagetseng. Bone ba ne ba mo raya bare, ga ba ise ba amogele dikwalo tsa Bajuta ba ba mo Jerusalema. Okare ba ne ba rata go itse thata ka Bokresete. Ke fa ba rulaganya letsatsi le ba tlaa tlang go reetsa Paulo a ruta. Ka letsatsi leo batho ba bantsi ba ne ba tla go utlwa Paulo a rera Efangele ya ga Kresete. Go tloga mo mosong go fitlha maitseboa one a tlhalosa boammaruri jwa ga Kresete. Ba bangwe ba ne ba dumela bangwe ba gana. Paulo o ne a ba bolella gore o tlaa nna nako mo Roma a ruta Badišhaba.

Paulo o ne a solofetse gore o tlaa seka ka bonako mme a gololwe. Go ne ga feta dingwaga tse pedi Paulo a ntse a emetse go sekisiwa. Paulo o ne a rera gape a ruta mme a amogela mongwe le mongwe yo o yo o tlang kwa go ena. Ga a ka a boifa sepe. Mo dingwageng tsena tse pedi batho ba bantsi ba ne ba itse Kresete jaaka Mopholosi wa bone.

DIKWALO TSA MO KGOLEGONG

Dingwaga tsena tse pedi mo kgolegong mo Roma e ne ele dingwaga tsa go dira go Paulo. Gase fela gore o ne a gapela batho ba bantsi go Kresete, fela gape o ne a bona nako ya go kwala makwalo a mane, ke makwalo a a mo Kgolaganong e Ntšha. One ke ana:

- (1) Bafilipi
- (2) Baefeso
- (3) Bakolose
- (4) Filemone

BAFILIFI

Lekwalo lena le kwaletse phuthego ya kwa Filipi. E ne ele ngwe ya diphuthego tse Paulo a ne a di rata thata. Phuthego e ne ya utlwa ka ga bothata jwa ga Paulo mme ya romella dikatso tse di ntsi. Lekwalo le le kwaletsweng Bafilipi e ne ele la lorato le tebogo. Le fa lekwalo le na le Kwadilwe mo Kgolegong le tletse boitumelo, tsholofelo, tumelo le tshepo.

Ka maitemogelo ana a ga Paulo re tshwanetse go ithuta gore fa re ineetse ka gotlhe go Modimo, o tlaa re thusa go fenyha matshwenyego le mathata otlhe a rona.

Ditsala tsa Bakresete di ne di tswa mafelong a a Kgakala go tla go thusa Paulo. Luka o ne a na nae. Timotheo o ne a mo etela gantsi. Epafrodito o ne a tswa Filipi a tlisitse ditumediso tsa phuthego tsa lorato mme a nna le Paulo.

Epafrodito o ne o boela morago a lwala, a lwala thata a le gaufi le go swa. Paulo o ne a mo romela gae ka lekwalo. Ke lekwalo la Bafilipi.

Mo lekwalong la Bafilipi gona le mafoko ana:

“Jaanong mo amogeleng mo Moreneng ka boitumelo jotlhe; tlotlang ba ba nseng jalo. Go nne o ne a le gaufi le go swa ka ntlha ya tiro ya ga Kriste, ka a sa rekegela botshelo jwa gagwe, gore a ntirele mo lona lo tlhaetseng go ntirela teng”.

“Ke itumetse thata mo Moreneng, ka jaanong lo tiile gape go ka gopola go ntlamela; legale lo ntse l o nkgopola, mme lo sa bone phatlha. Ga ke bue jalo ka ntlha ya go tlhoka; go nne ke ithutile go itumella tse ke leng mo go tsone lehuma kea le itse le letlotlo kea le itse, Tsotlhe ke di kgona ka ene yo o nthatafatsang, ebong Kriste:

Jaanong di ntlaletse, ke amogetse neo ya go tswa go lona ka Epafrodio. Mme Modimo wame o tlaa tlo abela tsotlhe tse lo ditlhokang ka fa khumong ya ona mo kgalalelong e e mo go Kriste Jesu. Ka moo le itumele gonne le ba One. Seishwenyegeleng sepe, mme a ka metlha tse lo di tlhoka di itsisiwe Modimo ka thapelo le kopo, di na le tebogo. Mme kagiso ya Modimo e e fetang tlhaloganyo e tlaa boloka dipelo tsa lona.

“Gakologelwang tsotlhe tsa boammaruri, tsotlhe tsa tlotlego le tsa tshiamo le tsotlhe tsa boitsheko le tsotlhe tsa lorato le tsotlhe tsa tumo e ntle di akanyeng.”

“Ga ke ikae gore ke setse ke tshwere. Sengwe le sengwe se se siameng se ke se dirang ke se dira ka thuso ya ga Kresete yo ke mo ikanyang, yo ke mo ratang. Ga ke a fella ka gope fela ke nise ke mo setse morago. Diphoso tsame ke di tlogetse kwa morago, ke di lebetse. Selo se le sengwe kea se dira ke se:

“Ke gagamalela sephego same, sephego sa Modimo ka nna, mme tsela ya go dira jalo ke go ikanya Jesu Kresete.”

“Bakaulengwe ba ba nang le nna fano ba lo dumedisa.”

FILEMONE

Lekwalo le le kwaletsweng Filemone le farologanye le makwalo a mangwe a ga Paulo. Ke kgang ya ga Paulo fa a kopanya gape ba babedi ba a ba tihabolotseng. Erile Paulo a santse a le mo Efeso a kopana le banna ba ba tswang kwa Asiya. Yo mongwe wa bone e ne le monna wa mohumi yo mogolo a tswa kwa Kolose. Monna yo, leina la gagwe e ne ele Filemone, ene ya nna Mokresete ka go utlwa Paulo a rera. Filemone ene ya nna moetapele wa Bakresete mo felong fa a ne a nna teng. Ba ne ba kopana mo ntlung ya gagwe go tshwara ditirelo tsa bone.

Filemone o ne a na le lekgoba le le lengwe, gongwe go feta le le lengwe. Yo mongwe wa o ne e ne ele Onesimo, yo o ne ja tlhoafaletse kgololego mme ebile a loga maano a go ngwega. Erile fa Onesimo a ngwega o ne a tsaya madi a ga mongagwe. Ke fa a ya kwa Roma. Teng o ne a kopana le Paulo a mo utlwa a rera. Paulo o ne a gapela Onesimo go Kresete mme a bolella Onesimo gore o tshwanetse go boela go mongagwe kwa Kolose. Lantlha o ne a belaela. O ne a sa rate go latlhegelwa ke kgololego ya gagwe e e seng kgale a e bonye. Paulo o ne a tiisa gore o tshwanetse go boela teng go nne go dira jalo ke tiro ya gagwe gonne ele Mokresete. Paulo o ne a mo solofetsa gore o tlaa mo romela ka lekwalo le a lekwallang Filemone go mo tihalosetsa ka ga se se diragetseng. Bokhutlong Onesimo o ne a dumela go boela morago, mme Paulo a mo romela ka lekwalo lena. Paulo o ne a rapella Onesimo gore a gololwe, fela o ne are Filemone o tshwanetse go itlhophelela gore o rata go dira jang.

Re ka eletsa go tshwana le Paulo ka go nne o ne a tlhoafaletse go etela diphuthego tsena tse dintšha, fela sena ga se aka sa mo fenya. O ne a direla diphuthego tsena ka tsela ele ngwe fela e e kgonegang, eleng ka makwalo a gagwe.

THUTHO 11

PAULO MO KGOLEGONG

GO BUISA MO DIKWALONG: Baefeso 2:1-10

TEMANA YA GO E ITSE KA TLHOGO: *“Gonne lo pholositswe ka boitshwarelo ka tumelo; mme ga go tswa mo go lona, ke neo ya Modimo”* – Baefeso 2:8.

Mo thutong e e fetileng re ithutile gore ka nako ya go golegwa Paulo o ne a kgona go gapela batho ba bantsi go Kresete. Gape o ne a kwalela diphuthego tsa gagwe makwalo a re a buisang le go a dirisa gompiano jaaka mokaedi mo maphelong a rona le mo diphuthegong tsa rona. Mo thutong ena re tlile go ithuta ka ga makwalo a mabedi a bofelo a ga Paulo, a Paulo a kwadileng a le mo kgolegolong.

LEKWALO LA BAKOLOSE

Phuthego ya kwa Kolose e simologile ka nako ya dingwaga tse tharo tse Paulo a di ntseng mo motseng wa Efeso. Ga re itse gore a Paulo o kile a etela phuthego ena, fela o ne a itse baetapele ba yone gape o ne a na le kgatlhegelo e kgolo mo go yone. Erile Paulo a ntse a le mo kgolegolong a utlwa ka ga thuto ya maaka e e ne e tswella pele mo Karolong e o ya Asiya. O kare diphuthego kwa Efeso le kwa Kolose di ne di tshwengwa ke dithuto tsena tsa maaka, mme Paulo o ne a tshwenyegile ka ntlha ya bone ke fa a ba kwalla jaana:

“Le fa ke le kgakala le lona, fela ke gaufi le lona mo loratong lwame. Ke leboga Modimo gonne lo le ba Morena Jesu Kresete yo o tlileng go re bontsha gore Modimo o ntse jang.

“Jaanong ka lo itse Jesu phelang jaaka ena, lo apotse ditsela tsa lona tsa bogale, le puo ya lona ya maaka, itshokeng, lo ratane, lo tshwarelane. Mme le fa ele eng se lo se dirang ka puo gongwe ka tiro, dira tsotlhe lo di direle Morena ka dipelo tsotlhe tsa lona.

Le se letlelle mongwe go le ruta go ikanya medimo esele. Ke Kresete fela yo o tlaa lo abelang tsotlhe tse lo di tlhokang, gonne Modimo o mo neile nonofo le kgalalelo.”

BAEFESO

Okare lekwalo la Baefeso e ne ele lekwalo lo lo tshwanetse go tsamaisiwa, ke gore ke lekwalo le le ne le tlaa romelwa go tswa go phuthhego e ngwe go ya go e ngwe go fitlha le buisiwa ke diphuthhego tsotlhe tsa tikologo eo. Mo lekwalong o ka buisa mafoko a a tshwanang le ana:

“Lona Baditshaba lone lo tlhola lo utlwa gore ga lo na go ka nna ba lapa la Modimo. Jaanong le a itse gore seo gase boammaruri. Go nne Kresete o thubile lebotana le le ne le re kgaoganyana, ka go nne re mo rata (Bajuta le Baditshaba) mmogo ba dumela mo go Rara. Jaanong ga lo thole lo le baeng gongwe batsamai. Botlhe re bana ba lapa la Modimo. Rotlhe mmogo re moago wa tempele ya gagwe. Motheo ke baapostoli le baporofeta, mme rona re moago.

“Le seka la tshwenyega ka go nne ke tshwerwe mo mo kgolegong. Gonne le fa ke le yo monyenyanane mo go ba ba ratang Modimo, fela Modimo o nneile neo ya go lo rerela digakgamatso tsa lorato le Modimo o re ratang ka lone. Ke a lo rapella gore a phele mo dipelong tsa lona ka tumelo gore lo tle lo itse ka nosi lorato lwa ga Kresete. Bophara jwa lone, botelle jwa lone, boteng jwa lorato lwa ga Kresete lele fetang tlhaloganyano ya rona.

“Nna mogolegwa, ke lo rapela gore lo phela ka moo Bakresete ba tshwanetseng go phela ke teng, lo nne botho, le boitshoko. Ga le tlhole le tshwana le ka nako ele le ise le nne Bakresete. Apolang bogale jwa lona, le ditsela tsa modumo. Le tlhomogelane pelo, lo nne botho, lo tshwarelane fela jaaka Modimo o lo itshwaretse ka nitlha ya ga Jesu.”

Fa Paulo a ntse a kwala jalo o ne a etse tlhoko molebeledi wa gagwe. Diaparo tsa gagwe e ne ele thebe, le tshaka, le futshe ya tshipi, le tlhabano tsa maoto, ditlhako le lebanta – tsena e ne ele yunifomo ya masole a Roma. Ke fa a tswella pele ka lekwalo la gagwe go Baefeso.

Lo tlaa lwa le mmaba yo lo ka se kang lwa mmona, eseng masole a batho fela ke bobbe ba mefuta yotlhe. Aparang ditlhabano tsotlhe tsa Modimo go le sireletsa mo bosuleng. Emang mme lo lwe le mmaba ona.

Emang! Seitlamma matheka sa lona ke boammaruri. Sefemela sehuba sa lona ke tshiamo. Mo dinaong lo rwele iketleetlo ya Efangele ya Kagiso. Tsaya thebe ya tumelo ya ya lona go itshireletsa go metswi yotlhe e e tshubang ya yo o bosula. Futshe ya lona ya tshipi ke pholoso ya Modimo. Tshaka ya lona ke lefoko la Modimo.

“Emang ka dinao lo lwe. Fa lo dirile sengwe le sengwe se lo kgonang go se dira, tswellang pele lo lwe.”

Rapelang lo nne lo rapele jalo. Rapellang botlhe ba ba ratang Kresete, segolo lo nthapelle gore ke tswelle pele go bua ke sa boife, ke le mogolegwi mo dikgoleng.

“A Kagiso le lorato di nne le lona.

“Paulo morongwa wa Efangele wa ga Kresete go Baditšhaba, Ka taelo ya Modimo.”

Erile morago ga dingwaga tse pedi ke fa Paulo a gololwa mo kgolegolong. Ga go a kwadiwa sepe mo Beibeleng ka ga kgang ena fela ngwao di re bolella gore Paulo o ne a santse a tlaa tswella pele ka tiro ya borongwa ka go etela diphuthego gape kwa Grisi, Makedonia, le mafatshe a mangwe a Asiya yo monyenyanane.

MALATSI A BOFELO AGA PAULO

GO BUISA MO DIKWALONG: 2 Timotheo 2:1-15

TEMANA YA GO E ITSE KA TLHOGO: *“O nne tlhaga gore o itshupetse Modimo o le yo o ikanyegang, o le modiri yo o senang go tlhajwa ke ditlhong, yo o lebanyang lefoko la boammaruri ka tshwanelo”* – 2 Timotheo 2:15.

Erile fa Paulo o gololwa mo kgolegelo a boela morago go diphuthago tse a di simolotseng. Paulo o tshwanetse a bo a ne a tshwenyegile thata ka ga diphuthago tsena mme o ne a tlhoafaletse go boela go bone ka bonako jo bo ka kgonegang.

GO KERETE

Mo setlhakatlhakeng sa Kerete go ne na le dikete-kete tsa batho. Gatwe mo setlhakatlhakeng sena go ne go na le metse e le leggolo mo setlhakatlhakeng sena. Batho ba teng ba ne ba le bosula gape ele baikepi. Banna le basadi ba ne baa nwa veine thata. Ba ne ba utswa mo dikepeng tse di fetang. Gape mo Setlhakatlhakeng sena go ne go na le Bajuta bangwe ba eneng ele banna ba kgwebo ba bagolo. Tito o ne a romelwa kwa Kerete ele morongwa wa Efangele. Gongwe Paulo o ne a nna nakonyana teng ana le Tito. Tiro ya mo Kerete ene ya atlega thata. Ba bantsi ba ne ba gapelwa go Kresete.

Erile morago ga moo Paulo a kwalela Tito lekwalo a mmolella gore o tshwanetse go dirisanya jang le phuthago ya mo Kerete. Mo lekwalong lena Paulo o kopa Tito go kopana nae mo Nikopoli. Gongwe Tito o ne ana le Paulo fa ane a le mo kgolegelong lekgetlo la bobedi.

GO TSHUBIWA GA ROMA

Mo Roma go ne go na le balaodi bangwe ba baikepi go feta Nero. O buisitse Roma dingwaga di le lesome le bone. Nero o ne a dirile bobebongwe le bongwe jo bo ka diriwang. O ne a bolaya mmagwe yo o mo tsetseng. A bolaya mosadi wa gagwe le ditsala tsa gagwe. Ditiragalo tsa lefatshe di re bolella gore Nero o ne a tshuba motse wa Roma. Nero o ne a ikutlwa gore ke moopedi yo mogolo. O ne a akanya gore

gongwe fa a ka bogela mollo o mogolo a ka kgona go tshameka violini ya gagwe sentle thata. O ne a simolola mollo ka go gotetsa mojako o o kwa godimo, a bogela motse o mogolo o shwa a ntse a letsa violini ya gagwe. Motse o tukile matsatsi a le marataro. Batho ba Roma ba ne ba simolola go gakala mme ba galefa thata kantlha ya mollo ona. Ke Nero are Bakresete ke bone ba goteditseng mollo oo. Ke moo go neng ga simologa pogiso e e setlhogo, e e thata go Bakresete. Bakresete ba bantsi ba ne ba fisiwa ka mollo teng moo.

Ka nako eo Paulo o ne a itsege fa ele moeteledipele wa Bakresete, mme ka mo bophelo jwa gagwe bo ne bo le mo kotsing ka dinako tsotlhe.

GO GOLEGWA GA PAULO

Erile fa Paulo a tshwarwa la bobedi go bonala gore o ne a beiwa mo kgolegolong, mo go leng maruru, mo lefifing mo kgolegolong e e boitshegang. Ka nako ena Paulo o ne a sa etelwe ke ditsala tsa gagwe jaaka la ntlha. Ba bangwe ba ne ba boifa go etela Paulo ka go nne ba ne ba boifa gore ba ka bolaiwa.

Erile fa Paulo a etela diphuthego tsa gagwe la bofela ke fa a kwalla Timotheo lekwalo le le lengwe fela.

Timotheo o ne a nna Mokresete fa Paulo a ne a etetse motse wa Lesitara lantlha. Rraago Timotheo e ne ele Moditshaba mme mmaagwe e ne ele Mojuta yo o dumetseng. E ne ele lekau le lentle thata le Paulo a neng a tsamaya le lone mo letsholong la gagwe la bobedi. Go tloga ka nako ena go ya pele e ne ele moeteledipele mo phuthegong. Paulo o mmita jaana: “Ngwanake tota mo tumelong”. Erile morago ga moo Timotheo ya nna moruti wa phuthego ya kwa Efeso.

MAKWALO AGA TIMOTHEO

Fa Paulo a ne a le mo kgolegolong ya Roma la bobedi o ne a kwalela Timotheo lekwalo le lengwe. Lekwalo la ga Timotheo le buisa jaaka:

“Morwaaka yo o rategang.”

“Nna motlhabani yo o siameng wa ga Jesu Kresete le fa tselo e le thata. O gakologelwe kagale tse o di dumelang. Gakologelwa ba ba bolokileng tumelo mme ba go neela yone. Tswelelapele ka go tlhabana tlhabano e e molemo ya gago. Tshegetsatsa dilo tse o di dumelang.

Dira jalo gore o tshwanele se Modimo a se letlellang, ithute lefoko la Modimo, mme o tlaa nna modiri yo o senang go tlhabiwa ke dithlong.

“Timotheo ke leboga Modimo ka wena mo dithapelong tsame bosigo le motshegare. Ke eletsatsa thata go ka go bona! Gakologelwa ka dinako tsotlhe neo ya gago ya go ruta mo Moyeng wa Modimo wa nonofo le lorato”.

“O se ka wa tlhabiwa ke ditlhong ka nna go nne ke le mo kgolegong. Ga ke tlhabiwe ke ditlhong. Gonne ke itse gore o tlaa mpolokela se ke mo tshepetseng sone ka bosenang bokhutlo”.

“Timotheo, leka go tla go mpona ka bonako, mariga a ise a tsene. O tle le kobo e ke e tlogetse kwa Teroase le dikwalo, o ntlele dikwalo. Tlaa ka bonako. Ke Luka fela yo o nang le nna. Demase o ntlogetse. Tigiko ene ke mo rometse kwa Efeso. Tsaya Mareko o tle nae. Itlhaganele go tla ka bonako.”

“Ga ke boife, ke a itse gore nako yame ya go phela e khutshwane, ke ipaakanyeditse go tsamaya. Ke tlabanye tlabano e e molemo, Ke weditse tiro yame, ke bolokile tumelo. Morena Moatlhodi yo o siameng o tlaa nnaya tuelo yame le ya rona botlhe ba ba mo ratang . . . Fela, Timotheo itlhaganele.”

Ga re itse gore a Timotheo o ne a fitlha go Paulo pele ga loso lwa gagwe. Ana ke mafoko a bofelo a ga Paulo a re nang nao.

Mme mafoko ana ke bokhutlo jo bo siameng jwa bophelo jwa ga Paulo. Molatedi yo mogolo wa ga Jesu, Morongwa wa Efangele go Baditshaba yo mogolo, moreri yo mogolo.

